

Cart De'en Bzoj San Pabən' Par Beṇə' Roma Ca'

*Pabən' chguape' diox beṇə' ca' chso'elao' Cristən'
Roman'*

¹ Nada' Pab naca' beṇə' güen žin che Jesocristən'. Diozən' gwleje' nada' par naca' apostol na' bsele'e nada' par nič əchyixjui'a de'e güen de'e cobə che'enə'.

² Ca ni'ite ben Diozən' mendad boso'ozoj profet ca' Xtiže'enə' ca naquə lyebe de'en bene' de que əgwsele'e dižə' güen dižə' cobə che'enə'.

³ De'e güen de'e cobən' cho'en dižə' che Xi'in Diozən', Xancho Jesocristən'. Jesocristən' golje' yežlyo nga lao dia che de'e Rei Dabin'.

⁴ Na' nezecho de que Jesocristən' leczə naque' doalje Xi'in Diozən' chedə' bebane' ladjə beṇə' guat ca'. Na' de'en bebane'enə' nezecho de que nape' yelə' guac che Spirit che Diozən'.

⁵ Chonlilaža'a Jesocristən' na' de'e na'anə' Diozən' banoe' chia' nłana' žin che apostol. Gwleje' nada' par chona' ca ša' beṇə' so'onlilažə' le' yoguə' nasyon na' so'one' can' ne'enə' par nič si'e yelə' bala'an.

⁶ Na' lenczə le'e gwlej Jesocristən' par nič nacle xi'ine', len beṇə' ca' yelə' beṇə' leczə chso'onlilažə' le' na' chso'one' can' ne'enə'.

⁷ Nada' Pab chzoja' cart nga par yoguə' le'e nitə'əle Roman' ca le'e chaque Diozən' chele. Diozən' gwleje' le'e par nič nacle lažə' ne'enə'. Chona' orasyon par nič Xacho Diozən' na' Xancho

Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Pabən' gone'ene' žjəlanə'e beṇə' Roma ca'

⁸ Chona' orasyon cho'a yelə' choxcwlen che Diozən' por le'e, na' Jesocristən' chaclene' nada' par chona' orasyonṇə'. Cho'a yelə' choxcwlen che' ca naquə doxenlə yežlyonə' chsoe' beṇə' dižə' de que yoguə' le'e chonlilažə'əle Jesocristən'.

⁹ Diozən' nezene' yoguə' las catə' chona' orasyonṇə' chṇaba' gaquəlene' le'e. Le'enə' cho'elaogua'a do yichj do laža'a ca de'en chyixjui'a de'e güen de'e cobə de'en chzejni'in che Xi'ine'enə'.

¹⁰ Na' chṇaba' lao Diozən' güe'e latjə par delaṇa'a le'e ṇa'a.

¹¹ La' zelažə'əchgua' delaṇa'a le'e par dezejni'ida' le'e de'en babsed bablo'ine' nada' par niç sole gonlilažə'əchlene'.

¹² Che'enda' delaṇa'a le'e par güe' ljuežjcho balor nga ngalə, chedə' la' le'e na' nada' chonlilažə'əcho Jesocristən'.

¹³ Beṇə' bišə', che'enda' ənezele de que zan las bago'onda' yida' delaṇa'a le'e pero xte ṇa'a bitonə' gac. Che'enda' yedəyena' par niç gonchle can' chazlažə' Diozən' can' bajena' entr yeziquə'əchlə beṇə' cui zjənaquə beṇə' Izrael.

¹⁴ Nezda' cheyalə' gua'a dižə' güen dižə' cobə che Jesocristən' len beṇə' ca' ža' syoda, na' len beṇə' yixə' na' lecəzə ca' len beṇə' chsa'ac letr na' beṇə' cui chsa'ac letr.

¹⁵ De'e na'anə' che'enchgüeida' gona' ga zelao saquə'əda' chixjue'ida' le'e de'e güen de'e cobə che Jesocristən', le'e ža'ale Roman'.

Dižə' güen dižə' cobən' nsa'an yelə' guac che Diozən' par beṇə' chse'ejle'e chei

16 Diozən' nape' yelə' guac xen. Na' dižə' güen dižə' cobə che'enə' nsa'an yelə' guac che'enə', par nich ca' beṇə' chse'ejle' chei, le' yebeje' lega'aque' xni'a de'e malən'. Diozən' che'enchgüeine' yebeje' chio'o beṇə' Izrael xni'a de'e malən' na' leczə ch-ene'ene' yebeje' chio'o cui naccho beṇə' Izrael xni'a de'e malən'. De'e na'anə' bito cheto'ida' che dižə' güen dižə' cobə che Jesocristən'.

17 Dižə' güen dižə' cobə che Jesocristən' chzejni'in chio'o de que Diozən' ne' naccho beṇə' güen laogüe'enə' chedə' chonlilažə'əcho Jesocristən' na' can' choncze' len notə'ətezə beṇə' chso'onlilažə' le'. Can' nyoj Xtiže'enə', nan: “Šə chonlilažə'əcho Diozən', le'enə' ne' de que naccho beṇə' güen laogüe'enə', na' de'e na'anə' guatə'aczə yelə' mban checho zejlicane šə chonlilažə'əchone'.”

De xtolə' beṇəchən'

18 Na' Diozən' chlo'ine' chio'o beṇəch, zoze' yoba na'ate, can' əgwnežjue' castigw zejlicane che yoguə' beṇə' ca' cabi chso'elao' le' na' nic chso'one' can' cheyalə' so'one'. Na' yelə' güen de'e mal chega'aque'enə' bito cho'en latjə yesə'əneze beṇə' yoblə de'en naquə de'e li.

19 Bazjəneze' de'en de de'e guaquə nezecho che Diozən' chedə' Diozən' bablo'ine'en yoguə'əcho.

20 Na' bito bi bi de de'e yoso'ode'i beṇə' cui chso'elao' Diozən' yesə'əne' cui zjəneze' šə zoe'enə'. La' gwzolaozən dezd catə'n əbxi'e yežlyonə' xte ža neža chgüiacho beṇə' ca' na' bia ca' na' de'e ca' bene'enə'. De'e na'anə' caguə naquən

zdebə gombi'acho de'e ca' cui zjənla' che Diozən',
ca yelə' gwnabia' che'enə' de'en de zejlicane na'
de'en cheyalə' güe'ela'ochone'.

21 Na' ca naquə beṇə' ca' cui chso'elao'
Diozən', zjənezene' de que zo Diozən' pero bito
chso'elaogüe'ene', nic chso'e yelə' choxcwlen che'.
Ca naquə xbab chega'aque'enə' bito bi zaquə'an
na' bazjənchoḷ yichjla'ažda'oga'aque'enə'.

22 Chəsə'əne' zjənaque' beṇə' sin' pero chso'one'
xbab de'e cui bi zaquə'.

23 Choso'ozoe' Diozən' ca'alə, bito
chso'elaogüe'ene', len Dioz nan' naque'
le'ezelaogüe beṇə' zaque'e na' zoe' zejlicane. Bito
chso'elaogüe'ene', chso'onchso'one' de'e yoblə,
chso'ela'ozeche' no lgua'a lsaquə' beṇəch beṇə' te
chei, na' leczə chso'elaogüe'e lgua'a lsaquə' bia zo
xile'e, bia yixə' bia žia tap ni'a ne'i na' bia zjənxobə
le'i.

24 Ca naquə beṇə' ca' chso'on de'e ca' zjənac
ca', Diozən' bagwlejyichje' lega'aque' par chso'one'
de'e mal can' nan lo'o yichjla'ažda'oga'aque'enə' na'
de'e na'anə' chso'onchgüe' yelə' zto' che cuerp
chega'aque'enə'.

25 Bagwlejyichje' lega'aque' par chso'one'
de'e ca' chedə' lega'aque' bagosə'əbejyichje'
dižə' li che'enə' par chse'ejle'e de'e güenlažə'.
Chse'ejni'alažə'zeche' na' chso'ela'ozeche' de'e
ca' ben Diozən' na' bito chso'one' cas che Diozən'
ben' ben yoguə'əlöl beṇəch na' yoguə' bia chaš
na' yeziquə'əchlə de'e ca' yelə'. Bito chso'one' cas
che' la'aṇə'əczə naque' ben' cheyalə' güe'ela'ocho
zejlicane. La' can' naquən.

26 De'e na'anə' Diozən' bagwlejyichje'

lega'aque' par chso'one' yelə' zto' can' nan lo'o yichjla'ažda'oga'aque'enə'. Ca naquə no'ol ca' bito chəsə'əque'e beṇə' byo, lete chəsyə'əzolentezə le'e ljuežj no'olzəga'aque' par niçh chso'one' de'e cui cheyalə' so'one'.

²⁷ Na' le'egatezəczə ca' chso'on beṇə' byo ca' chəsyə'əzolen ljuežj beṇə' byoga'aque' lgua'a de'e yesə'əca'a no'ol çhega'aque'. Na' naquən to yelə' zto' de'en chso'on beṇə' byo con beṇə' byoga'ac, tant chəsə'əzelažə' ljuežjga'aque'. Na' de'en chac çhe cuerp çhega'aque'enə' naquən to castigw de'en cheyalə' yesə'əzi'e lao yelə' güen de'e mal çhega'aque'enə'.

²⁸ Na' laogüe de'e cui chse'enene' so'one' cas çhe Diozən', Diozən' bagwlejyichje' lega'aque' len xbab mal çhega'aque'enə', na' chso'one' de'e cui cheyalə' so'one'.

²⁹ Por de'e cui cheyalə' so'one'en chso'one'. Zjənaljəne'. Chesyə'əbeine' chso'one' contr beṇə'. Chəsə'əzelažə'e bi de çhe beṇə' yoblə, na' no bia yixə' çhega'aque' na' no beṇə' nitə' ližga'aque'. Zjənaque' beṇə' xi'a juisy na' leczə chsa'acxi'i ljuežje'. Syempr chso'ot ljuežje', chəsə'ədile', choso'oəoyague', na' chəsyə'əyone' clelələ dižə' de'e chse'ene'ene'. Na' zjənaque' beṇə' goçhitj dižə'.

³⁰ Chəsə'əṇe' mal çhe beṇə' yoblə. Chəsə'əgue'ine' Diozən'. Bitobi respet zjənombi'e par beṇə' yoblə. Chsa'alažə'e. Zjənaque' beṇə' güe'elao' cuine. Chəsə'əyiljlažə'e na' chəsə'əželene' can' chso'one' de'e mal. Bito choso'ozenague' çhe xaxna'aga'aque'.

³¹ Bito chse'ejni'ine'. Bito chso'one' complir bi

lyebe de'e chso'one'. Bito chsa'aque'ne' che beṇə' yoblə. Zjənaque' beṇə' ggo'olaže'e. Bito zjənombi'e yelə' cheyaše'e ljuežje.

³² Zjənezcene' binlo de que Dioz nan' nchoglaogüe'en cheyalə' yeyejcho lao yi' gabilən' šə goncho can' chso'one'enə'. Pero lega'aque' ne'e zja'accze' chso'one' ca' na' chesyə'əbeine' chso'on beṇə' yoblə can' chso'one'enə'. *Pab*

2

Diozən' zdacze' licha ca de'en chone' beṇəchən' castigw che xtolə'əga'aque'enə'

¹ De'e nan' notə'ətezə naccho bito gaquə əṇacho bito bi xtolə'əcho de catə' choncho xbab che beṇə' yoblə de que naque' beṇə' mal, chedə' catə'ən choncho xbab che beṇə' yoblə de que naque' beṇə' mal, chio'otezən' chchixə cuincho. Chacbe'icho de que beṇə' yoblə chone' de'e mal len leczə can' chon chio'o.

² Nezecho šə choncho de'e ca' zjənac ca' Diozən' ne' checho de xtolə'əcho, na' zdacze' licha de'en ne' ca'.

³ De repent chaquecho de que Diozən' bito gone' castigw checho ca de'en choncho xbab che beṇə' yoblə de que chso'one' de'e mal len leczə can' choncho. Bito cheyalə' gaguecho de que cui gone' castigw checho, la' goncze'en.

⁴ De repent bito choncho cas ca naquə de'e güenchgua de'en chon Diozən' len chio'o lao yelə' beṇə' güen che'enə' na' yelə' xenlažə' che'enə'. Na' de repent bito choncho cas che' laogüe de'en cui le'e chontie' chio'o castigw. Diozən' chone' güen len chio'o par nich gaquəchgüeicho lo'o

yichjla'ažda'ochonə' che de'e mal de'en choncho par nich ca' yedinjechon.

⁵ Pero nacteccho beṇə' žod šə bito chedinjecho do yichj do lažə'əcho ca naquə xtolə'əchon'. Na' šə bito chedinjechon choncho ca gonch Diozən' chio'o castigw catə' əžin ža Diozən' əgwlo'e de que le' zdacze' licha ca de'en gone' castigw zejlicane che xtolə'əchon'.

⁶ Gone' chio'o castigw o gone' par nič gaquə de'e güen che chio'o beṇəch segon nac babencho.

⁷ Diozən' gone' chio'o yelə' mban zejlicane šə zotezə zocho choncho de'e güen, chedə' šə choncho ca' chlo'echo de que cheyiljlažə'əcho naclə gaquə par nič yežincho gan' zo'enə', na' par nič gone' chio'o yelə' bala'an, na' par nič socho zejlicane.

⁸ Na' šə chṇecho contr Diozən' na' cabi chzenagcho che dižə' li che'enə', chzenagzechcho che de'e malən', lechgualə əža'alažə' Diozən' chio'o na' gone' chio'o castigw zejlicane.

⁹ Zgua'atec chio'o beṇə' Izrael benecho xtižə' Diozən', na' šə choncho de'e mal chi' saquə'əcho na' əžaglacho. Na' chio'o cui naccho beṇə' Izrael gwdechlə benecho xtiže'enə', pero leczə chi' saquə'əcho na' əžaglacho šə choncho de'e malən'.

¹⁰ Na' šə choncho de'e güennə' gwžin ža catə' Diozən' gone' par nič gaccho beṇə' blaο, na' gone' chio'o yelə' bala'an, na' gone' par nič socho binlo len yichjla'ažda'ochon'. Gone' güen len chio'o beṇə' Izrael, pero na' leczə gone' güen len chio'o la'anə'əczə cui naccho beṇə' Izrael.

¹¹ Tozə can' chon Diozən' len yoguə' chio'o beṇəch.

¹² Yoguə' chio'o šə babencho de'e mal sin cuinə'

gombi'acho lei de'en bzoj de'e Moizezən', Diozən' ə̇choglaogüe'en checho cuiayi'icho por ni che de'en babencho de'e malən' la'anə'əczə šə cui nezecho can' na lein'. Na' yoguə' chio'o banombi'acho lein', Diozən' ə̇choglaogüe'en checho cuiayi'icho por ni che de'en cui bencho can' nanṇə'.

¹³ Caguə con yenecho lei na'anə' na' ə̇na Diozən' checho bitobi xtolə'əcho de. Pero šə choncho can' na lein', Diozən' ə̇ne' checho bitobi xtolə'əcho de.

¹⁴ Notə'ətezə beṇə' cui naquə beṇə' Izrael na' cui nombi'e lei de'en bzoj de'e Moizezən', zolə catə' chone' to chopə can' na lein' con de'e chidzən lo'o yichjla'aždaogüe'e. La'anə'əczə cui nombi'e lein', de'en chon yichjla'ažda'ogüen' mendad gone' naquən ca to lei.

¹⁵ Ben' chon ca' ža chlo'e de que lo'o yichjla'aždaogüe'e na' yo'o de'en naquə ca lein'. Na' catə' chone' de'en chone', lo'o yichjla'aždaogüe'e na' chone' xbab de que de'e malən' chone' o chone' xbab de que de'e güenṇə' chone'.

¹⁶ Gwžin ža catə' Diozən' gone' par nich Je-socrisən' ə̇choglaogüe'en che xbab che chio'o beṇəch de'en bencho bgašə'əzə, šə bencho xbab güen o šə bencho xbab mal. Can' chnia' catə' ə̇chyixjui'a dižə' güen dižə' cobə che Jesocrisən'.

Beṇə' Izrael ca' gwsa'aquene' de que gwnite'e binlo len Diozən' chedə' zjə̇nombi'e lein'

¹⁷ Bal le chonle xbab de que zole binlo len Diozən' chedə' nacle beṇə' Izrael na' nseidle lei de'en bzoj de'e Moizezən'. Cha'alažə'əle de que cho'ela'ole Diozən'.

18 Nezele de'en cho'olažə' Diozən'. Nezele de'en naquə de'e güen. Cho'ele dižə' chei de que naquən de'e güen, chedə' la' lei na'anə' nsedle.

19 De'e tant chaquele chejni'ile che Diozən' chonle xbab de que nezele par co'ole beṇə' nez na' par əgwzejni'ile beṇə' ca' zjəncḥol yichjla'ažda'oga'aque'enə'.

20 Na' chonle xbab de que nezele par əgwzejni'ile beṇə' cui chse'ejni'i na' par gacle maestr che bi'i xcuidə'. Laogüe de'en nsedle lei de'en bzoj de'e Moisezən' chaquele chejni'ile na' chaquele nezele de'en naquə de'e li.

21 Le'e chsed chlo'ile beṇə' yoblə, ḥbixchen' cui cholo'i cuinle? Chsed chlo'ile bito no cuan, len chbanle.

22 Chsed chlo'ile de que bito no co' xtoi na' bito no cuejyichj be'en chei o no'ol chei par solene' beṇə' yoblə, len choncze yoguə' de'en nale cui no gon. Na' chgue'ile lgua'a lsaquə' ca' de'en chse'ejni'alažə' beṇə', len bia'aczə chjelanle bitə'ətezə de'en zjəde do lo'o yo'o gan' zjəža' lgua'a lsaquə' ca'.

23 Cha'alažə'əle de'e nsedle lei de'en bzoj de'e Moisezən', pero laogüe de'e cui chonle can' na lein', chṇitle yelə' bala'an che Diozən'.

24 De'e li chonle can' nyoj Xtizə' Diozən' gan' nan: "De'en chonle de'e mal, zan beṇə' cui zjənaquə beṇə' Izrael chəsə'əṇe' contr Diozən'."

25 Chio'o beṇə' Izrael nsa'acho to seṇy lao cuerp chechon' de'en ne' sirconsision, na' zejen de que Diozən' gaquəlene' chio'o can' bene' lyebe. Na' seṇyən' zaquə'ən par chio'o šə choncho can' na lein'. Pero šə cui choncho can' na lein', bitobi zaquə'

señy de'en zochonə'.

26 Šə cui nsa'acho seņy de'en ne' sirconsisionņə' pero choncho can' na lein', gaccho cuent ca beņə' nsa'aczə seņy de'en ne' sirconsisionņə' la'aņə'əczə cui nsa'achon.

27 Balle bito bi seņy de'en ne' sirconsisionņə' nsa'ale, pero chonle complir can' na lein'. Na' laogüe de'en chonle complir can' na lein', chonle ca nachia' de que deczə xtolə' beņə' ca' zjənsa' seņy de'en ne' sirconsisionņə', chedə' nyoj lein' na' zjənombi'en, pero bito chso'one' can' nannə'.

28 Zan beņə' chsa'alje' lao dia che Izraelən' na' əzja'accze' chso'one' can' naquə costombr che beņə' Izraelən', pero lao Diozən' bito zjənaque' beņə' Izrael, na' nic zaquə' seņy de'en choso'ozo cuerp chega'aque'enə'.

29 Pero chio'o de'e li naccho beņə' Izrael šə chonlilažə'əcho Diozən' can' cheyalə' gonlilažə'əchone'. Na' de'en babocobə Diozən' yichjla'ažda'ochon' gwxaquə'əleben ca seņy de'en ne' sirconsision, na' zejen de que bagwleje' chio'o par naccho xi'ine'. Babše'e yichjla'ažda'ochon', caguə con nsa'acho to seņy lao cuerp chechon'. Na' šə chonlilažə'əchone', Diozən' əne' de que choncho güen, la'aņə'əczə šə notono no nochlə əna de que choncho güen.

3

1 ¿Bi de'e güen zedegua'an che chio'o beņə' Izrael laogüe de'en naccho beņə' Izrael? ¿Bi de'e güen de'e zedegua'an de'en zocho seņy de'en ne' sirconsisionņə'?

2 De'e xen de'e zedegua'an. Na' to de'en zedegua'an ca de'en əbnežjw Diozən' xaxta'ocho ca' Xtiže'enə' de'en nyojən'.

3 Na' bale' cui gwse'ejle'e chei. Pero bito gwde Diozən' ca'azə cui gone' can' na Xtiže'enə' la'anə'əczə bale' cui gwse'ejle'e chei.

4 Goncze' can' ne'enə'. Yoguə' laste ənacze' de'e linə' la'anə'əczə šə yoguə'ələl beṇə' yesə'əne' dižə' güenlažə'anə'. Chac canə' bzoj to profet gože' Diozən':

Le' əgwlo'ido' beṇəçhən' de que cho'o dižə' li.

Na' ca naquə beṇə' ca' chso'on xbab de que bito chono' complir can' na'onə',

əsa'acbe'ine' de que chonczo' can' na'onə'.

5 Quinga chəsə'əna balə beṇə' cui chse'ejni'i che Diozən'. Chəsə'əne' de que de'e mal de'en choncho chlo'in beṇəçhən' de que Diozən' naque' beṇə' chon de'e güen. Na' chəsə'əne' de que Diozən' bito zde' licha de'en gone' castigw che de'e mal de'en chonchon'.

6 Lechgualē clelən' chso'one' xbabən'. Žalə' de'e li can' chsa'aquene'enə' bitoczə gaquə gon Diozən' yelə' jostis che chio'o beṇəçh can' cheyalə'anə'. Pero la' goncze'en.

7 Na' beṇə' ca' chso'on xbabən' ca' lecə chəsə'əne' de que catə' chso'onlaže'e chso'one' ca chesyə'əyacbe'i beṇə' de que Diozən' naque' beṇə' güen ca naquən' cho'e por dižə' li. De'e na'anə' chsa'aquene' de que bito cheyalə' choglao Diozən' chega'aque' de que zjənapē' dolə' ca de'en chso'onlaže'e.

8 Balə beṇə' chso'one' contr neto', na' chso'one' cho'ato'onə' chəsə'əne' de que nato' çbixchen' cui

goncho de'e malən' par ničh gaquə de'e güennə?
Ca cheyalə'əczən' əgwnežjo Diozən' castigw che
non' ŋa ca'.

Notono nla' no cui napə dolə'

⁹ ¿Bixan' ža? ¿Enaquəch chio'o beṇə' Izrael beṇə'
güench cle ca chio'o cui naccho beṇə' Izrael? Bito.
Can' bagwnia', tozəczə can' chac che chio'o beṇə'
Izrael na' che chio'o cui naccho beṇə' Izrael,
yoguə'əcho zocho xni'a de'e malən'.

¹⁰ Can' nyojczə Xtižə' Diozən' nan:

Notono zo beṇə' zda liča, ni tlišə'əze'.

¹¹ Notono nla' beṇə' chejni'i che Diozən',
na' notono nla' beṇə' cheylje'ene'.

¹² Yoguə' beṇəchən' bagosə'əque'e nez mal.

Yogue'e bitobi zjəzaque'e.

Ni tlišə'əzə beṇə' chon de'e güen notono nla'.

¹³ Len xtižə'əga'aque'enə' chəsə'əxoayaguene'en
beṇə',

na' ca benen che bgüizə' gwxaquə'əlebe dižə' de'en
chso'enə'.

Ca zbanṇə' chlā' cuerp che bia guatən'
catə'ən bachožə'ən, ca' zbanṇə' naquə
xtižə'əga'aque'enə'.

¹⁴ Por dižə' mal dižə' əzban ža' cho'aga'aque'enə'.

¹⁵ Con bizə de'en choso'ode'ine' par chso'ote' beṇə'.

¹⁶ Gatə'ətezə chja'aque' con la' ggo'o yelə' yašə' yelə'
zin' chja'aque'.

¹⁷ Na' bito chesə'əzo chesə'əbeze' binlo len
ljuežjga'aque'enə'.

¹⁸ Bito chsa'ape' Diozən' respet.

¹⁹ Na' nezecho ca naquə yoguə' de'en na lei che
Diozən' goncho, nyojən par chio'o na' xaxta'ocho

ca' beṇə' ca' bnežjue' lein'. Pero ca naquə cui choncho can' nannə', ni tozə chio'o bito gaquə əṇacho de que naccho beṇə' güen. De'e na'anə' Diozən' əḥoglaogüe'en checho de que si'icho castigw che xtolə'əchon' can' əḥoglaogüe'en che yeziquə'əchlə beṇəchən'.

²⁰ Ni to chio'o beṇəch bito ṇa Diozən' checho de que naccho beṇə' güen por ni che bi de'en choncho de'en na lein', chedə' la' ni tocho bito choncho cayanə'ən nannə'. Lei na'anə' chzejni'in chio'o de que choncho de'e malən'.

Cheyalə' gonlilažə'əcho Jesocristən' par niḥ gachcho beṇə' güen lao Diozən'

²¹⁻²² Diozən' bablo'e can' ne' che notə'ətezcho de que naccho beṇə' güen laogüe'enə' šə chonlilažə'əcho Jesocristən'. Lein' na' de'en bosozo'oj profet ca' beṇə' ca' gwso'e xtižə' Diozən' cana' leczə chso'en dižə' de que can' gone'. Chio'o chonlilažə'əcho Jesocristən' bito chon Diozən' cuent checho šə bi de'e choncho complir de'en na lei che'enə'. Na' notə'ətezcho tozəczə can' chon Diozən' len chio'o la'anə'əczə šə naccho beṇə' Izrael o šə cui naccho.

²³ Yoguə'əlo'cho babencho de'e mal na' de'e na'anə' ni tocho bito gaquə əṇacho de que naccho beṇə' güen ca beṇə' güennə' naquə Diozən'.

²⁴ Nži'ilaže'e chio'o chonlilažə'əcho Cristo Jeso'osən'. Na' caguə bi chzi' Dioz na'anə' ne' checho de que naccho beṇə' güen laogüe'enə', chedə' la' bagwdixjw Cristo Jeso'osən' xtolə'əchon'.

²⁵ Antslən' bagwdapə Diozən' yelə' chxenlažə'ənə' bagwzoine' bguo'o bcheje' che de'e mal de'en bagwso'on beṇəchən' tši'i, na' bito blo'e can' chnežjue'

castigw che notə'ətezə beṇə' chso'on de'e malən'. Pero na'a par blo'e de que le' chnežjwcze' castigw che beṇə' chso'on de'e malən', gwleje' Cristo Jeso'osən' par gwdixjue' xtolə' beṇə'chən'. Na' Diozən' chñitlaogüe' xtolə' con beṇə' chso'onlilažə' Cristo Jeso'osən'.

²⁶ Na' de'en əbsele'ene'enə' nezecho de que Diozən' zdacze' licha de'en ne' che yoguə' chio'o chonlilažə'əcho Jeso'osən' de que naccho beṇə' güen laogüe'enə'.

²⁷ Bito cheyalə' güe'elao' cuincho əṇacho de que naccho beṇə' güen. Ni tocho cui naccho beṇə' güen por ni che bi de'e güen de'en choncho. Pero šə chonlilažə'əcho Jeso'osən' Diozən' ne' de que naccho beṇə' güen laogüe'enə'.

²⁸ Can' chejni'ichon, šə chonlilažə'əcho Jeso'osən' Diozən' ne' de que naccho beṇə' güen laogüe'enə' sin cui chone' cuent checho šə bi de'e choncho complir de'en na lein'.

²⁹ ¿EDiozən' naque' Xan chio'o beṇə' Izrael na'azən'? ¿Ecaguə' leczə naque' Xan chio'o cui naccho beṇə' Izrael?

³⁰ Cle naque' Xan yoguə'əlol beṇə'. Na' ne' che yoguə'əcho šə bachonlilažə'əcho Jeso'osən' naccho beṇə' güen laogüe'enə'. Tozəczə can' chone' len chio'o nsa'acho señy de'en ne' sirconsisionṇə' na' len chio'o cui nsa'achon.

³¹ ¿Echoncho lei de'en bzoj de'e Moisezən' ca to de'e cui bi zaque'enə' laogüe chonlilažə'əcho Jeso'osən'? Bito chonchon ca to de'e cui bi zaque'e, sino cho'elechchon balorən'.

Abraannə' benlilaž'e Diozən' na' de'e nan' goque' beṇə' güen lao Diozən'

¹ De'e xaxta'ocho Abraam be'enə' naccho dia, ĵbixa əṇacho çe'enə'?

² Žalə' por ni çe de'e güen de'en bene' na'anə' gwna Diozən' de que naque' beṇə' güen laogüe'enə', zaquə'əcze' par be'elao' cuine' žalə' ca'. Pero bito be'elao' cuine' lao Diozən'.

³ Le'e Xtižə' Diozən' de'en nyojən nan: "Abraannə' benlilaž'e Diozən' na' de'e nan' gwçhoglaon çe' de que naque' beṇə' güen lao Diozən'."

⁴ Catə' to beṇə' chone' žin chone' gan laxjue'enə' na' bito ṇacho de que xan žinnə' chone' to goclen catə'ən chnežjue'ene' laxjue'enə'. Na' ca'aczən' naquən len chio'o, žalə' babencho cayanə'ən non Diozən' mendad goncho bito naquən to goclen de'en chon Diozən' len chio'o catə'ən ne' naccho beṇə' güen laogüe'enə' žalə' ca'.

⁵ Pero naquəczən to goclen. Diozən' ne' de que naccho beṇə' güen laogüe'enə' šə chonlilažə'əchone' sin cui choncho xbab de que de'e güen de'en choncho chaclenən par əṇe' de que naccho beṇə' güen laogüe'enə'. Na' Diozən' chone' par niçh chio'o cui be'ela'ochone' antslə chaccho beṇə' güen laogüe'enə' catə' chonlilažə'əchone'.

⁶ Leczə de'e Dabin' be'e dižə' çe goclenṇə' de'en chon Diozən' len chio'o chonlilažə'əchone' ca de'en ne' naccho beṇə' güen laogüe'enə' sin cui chone' cuent šə bichlə de'e güen de'en choncho.

⁷ De'e Dabin' gwne':
Mba zocho šə babezi'ixen Diozən' çecheo çe de'e malən' bencho.
Mba zocho šə babṇitlaogüe' xtolə'əchon'.

8 Mba zocho šə chçhoglao Diozən' çhecho de que caguə bi xtolə'əcho denə'.

9 Chio'o nsa'acho seňy de'en ne' sirconsisionnə' bito cheyalə' goncho xbab de que chio'ozən' gaquə socho mba can' gwne'enə'. Lenczə beñə' ca' cui zjənsa' seňyən' gwaquə nite'e mba can' gwne'enə'. Nezecho de'en benlilažə' de'e Abraannə' Diozən' de'e na'anə' gwne' çhe' de que naque' beñə' güen laogüe'enə'.

10 Na' gwne' çhe de'e Abraannə' de que naque' beñə' güen laogüe'enə' antslə ze'e soe' seňy de'en ne' sirconsisionnə', caguə beyožlən'.

11 Na' gwdechlə gwzoe' seňyən' par gwnezeze' de que Diozən' bagwne' ca' çhe'. De'e Abraannə' gwzolaogüe' chonlilaže'e Diozən' catəən ze'e sole' seňyən' na' cana' gwna Diozən' naque' beñə' güen laogüe'enə'. De'e na'anə' nezecho de que Diozən' ne' ca' çhe notə'atezə beñə' cui zjəzo seňy de'en ne' sirconsisionnə' con šə chso'onlilaže'ene'. Na' lao Diozən' de'e Abraannə' naque' xaxtao' yoguə' chio'o chonlilažə'əcho Diozən'.

12 Na' leczə nezecho de que Diozən' ne' çhe chio'o nsa'acho seňyən' de que naccho beñə' güen laogüe'enə' šə chonlilažə'əchone'. Na' ne' ca' caguə por ni çhe de'en zocho seňyən' sino por ni çhe de'en chonlilažə'əchone' can' benlilažə' de'e Abraannə' le'.

Abraannə' benlilaže'e Diozən' na' de'e na'anə' Diozən' bene' lyebe de'e bene' len le'

13 De'e Abraannə' benlilaže'e Diozən', na' de'e na'anə' Diozən' bene' lyebe gone' par niçh Abraannə' len xi'in dia çhe' ca' yesə'anabi'e doxenlə yežlyon'. Bitu ben Diozən' cuent çhe

Abraannə' šə bene' complir can' na lei che'enə' sino de'en benlilaž'e Dioz na'anə' gwne' de que naque' beṇə' güen laogüe'enə' na' leczə de'e na'anə' bene' lyebe yesə'anabi'e yežlyon'.

14 Nitə' beṇə' chsa'aquene' por ni che de'en zjənaoga'aque' lein' yesə'anabi'e yežlyon'. Žalə' na'acłə lega'aque' yesə'anabi'e yežlyonə', bito bi zaquə' de'en chso'onlilažə' beṇə' Diozən', na' leczə ca' bito gon Diozən' complir can' bene' lyebe len xi'in dia che de'e Abraannə' žalə' chac ca'.

15 De'en gwdixjw Diozən' lei che'enə' na' beṇə'chən' cui choso'ozenague' chei, Diozən' gwnežjue' lega'aque' castigw zejlicane che xtolə'əga'aque'enə'. Žalə' cui zjənezene' bi de'e ca' cheyalə' so'one', bitobi xtolə'əga'aque' de, pero zjənezczene'en.

16 Ca' chaquən', chio'o chonlilažə'əcho Diozən' nabi'acho yežlyon'. Tant nži'ilažə' Diozən' chio'o chone' ca nabi'achon par nič gaquə can' bene' lyebe len yoguə' chio'o chone' cuent ca xi'in dia che de'e Abraannə'. Caguə gaquə ca' len beṇə' ca' zjəsə'ənao lei na'azən' sino leczə len notə'ətezə beṇə' chso'onlilažə' Diozən' can' benlilažə' de'e Abraannə' le', la' lāo Diozən' de'e Abraannə' naque' xaxtao' yoguə' chio'o chonlilažə'əcho Diozən'.

17 Can' nyojczə de'en gwna Diozən': "Banzo'a le' gaco' xaxtao' beṇə' ša' nasyon zan." Na' Diozən' nape' yelə' guac par yosbane' beṇə' guat ca' na' Diozən' chone' par nič chac bitə'ətezən' ne'enə'. De'e na'anə' cho'e dižə' che beṇə' ze'e za'ac ca chio'o beṇə'ch cho'echo dižə' che beṇə' banitə'.

18 Bito gwneze Abraannə' nacxa gaquən' gaquə can' gwna Diozən'. Pero gwyejle'e che Diozən' na'

gwzoe' lez de que Diozən' goncze' le' xaxtao' beṇə' ša' ṇasyon zan. Con gwyejle'e de que gaquə can' gož Diozən' le': "Beṇə' zan əsa'ac xi'in dia chio'."

¹⁹ Con gwzocze' beṇlilaže'e Diozən' la'aṇə'əczə gocbe'ine' banaque' beṇə' golə par so xi'ine'. Bazoe' casi to gueyoa iz, na' no'ol che' Saran' bitoch zoe' xlaogüe'e sane'.

²⁰ Gwzoteze' beṇlilaže'e Diozən' na' bito goquə šejlaže'e che lyebe de'en ben Diozən' len le', sino que gwzoe' chech beṇlilaže'ene' na' be'elaogüe'ene'.

²¹ Abraanṇə' gwṇezene' de que Diozən' guac gone' ca de'en bene' lyeben'.

²² Na' laogüe de'en beṇlilaže'e Diozən' de'e nan' gwchoglaon che' de que naque' beṇə' güen lao Diozən'.

²³ Na' nyojən de que de'en beṇlilaže'ene' na'anə' gwchoglaon che' de que naque' beṇə' güen lao Diozən'. Pero caguə nyojən par de'e Abraam na'azənə'.

²⁴⁻²⁵ Leczə nyojən par chio'o, la' leczə de'en chonlilažə'əcho Diozən' nchoglaon checho de que naccho beṇə' güen laogüe'enə'. Diozən' bsele'e Xancho Jeso'osən' par gwso'ot beṇə' le' na' bolis bosbane'ene' ladjo beṇə' guat ca'. Goc ca' len Jeso'osən' par nič gwduxje' xtolə'əchon' na' par nič Diozən' ne' che chio'o chonlilažə'əchone' de que naccho beṇə' güen laogüe'enə'.

5

Zochə binlo len Diozən' šə chonlilažə'əcho Jesocristən'

¹ Diozən' ne' de que naccho beṇə' güen laogüe'enə' chedə' chonlilažə'əcho Jesocristən',

na' Xancho Jesocrist na'anə' babene' par niç zocho binlo len Diozən'.

² De'en chonlilažə'açho Jesocristən' nži'ilažə' Diozən' chio'o na' gwzocze' əži'ilaže'e chio'o. Chebeicho nezecho gon Diozən' chio'o yelə' bala'an xen ca de'en de çe'.

³ Na' leczə chebeicho catə' chzaquə'əzi'icho, la' nezecho šə chgo'o chçhejlažə'açho catə'an chzaquə'əzi'icho nachən' gwçhejczecho catə'an de bichlə de'en saquə'əzi'icho.

⁴ Šə chgo'o chçhejlažə'açho catə'an chzaquə'əzi'ichon', Diozən' chebeine' can' choncho. Na' catə' chebeine' can' choncho, nezecho de que gaquəlenche' chio'o.

⁵ Na' catə'an nezecho de que gaquəlench Diozən' chio'o, bito chža'a yichjcho çhedə' nezecho babsele'e Spirit çe'enə' par zon len chio'o, chnen lo'o la'ažda'oçon' nan de que Diozən' chacchgüeine' çhecho.

⁶ Lao ne'e zocho xni'a de'e malən', Cristən' bnežjw cuine' gwso'ot beṇə' le'. Ben Cristən' ca' par gwduxjue' xtolə' chio'o cui be'ela'ocho Diozən'. Na' gwso'ote'ene' catə' bžin orən' banžia' Diozən' bia'.

⁷ Ca naquə chio'o beṇəçh, zdebə chonən par əçhebcho gwnežjo cuincho so'ot beṇə' chio'o lgua'a to beṇə' yoblə la'anə'əczə šə lgua'a to beṇə' zda licha. Pero gwchojlja to beṇə' yeyaxjene' gwnežjo cuine' so'ote'ene' lgua'a to beṇə' naquə beṇə' ži'ilažə'.

⁸ Pero catə'an chio'o nenaccho beṇə' güen de'e mal, Diozən' bsele'e Cristən' bnežjw cuine' por ni çhecho gwso'ot beṇə' le'. De'e na'anə' nezecho lechgualē chaque Diozən' çhecho.

9 Diozən' ne' de que naccho beṇə' güen laogüe'enə' cḥedə' Cristən' blalj xḥene'enə' par gwdixjue' xtolə'əchon'. Na' leczə ca' nezecho de que Cristən' bagoclene' chio'o chonlilažə'əchone' par niḥ ca' Diozən' bito goṇe' castigw cḥecho zejlicane.

10 Beṇə' contr cḥe Dioz nan' goccho. Pero na' Xi'ine' Cristən' bnežjw cuine' por ni cḥecho gwso'ot beṇə' le'. Ben Cristən' ca' par bozoe' chio'o binlo len Diozən'. Na' nezecho leczə zo Cristən' chone' par niḥ gaquə yichjla'ažda'ochon' güen can' naquə yichjla'ažda'ogüe'enə' cḥedə' ngodə'əcho txen len le'.

11 Na' leczə dech de'en cḥebeicho. Leczə chebeicho de'en nombi'acho Diozən', cḥedə' la' Jesocrist na'anə' baḥ bozoe' chio'o binlo len Diozən'.

De'e Adannə' bxi'e de'e malən' yežlyo nga, na' Jesocristən' bedəyene' par niḥ chac de'e güen

12 Yelə' godenag cḥe beṇə' nechən' ben' gwle Adannə', gwzolao de'e malən' yežlyo nga, na' de'e mal nan' nsa' yelə' gotən'. Na' de'e nan' den de que yoguə' beṇəḥən' chsa'ate' na' yogue'e chso'one' de'e mal.

13 Gwso'onczə beṇəḥən' de'en malən' dezd tyemp cḥe Adannə' antslə cuiṇə' cḥixjw Diozən' lei cḥe'enə'. Na' catə' cuiṇə' cḥixjue' lei cḥe'enə' nž'a'alə can' gwḥoglaogüe'en cḥe beṇəḥən' catə'an gwso'one' de'e malən'.

14 Pero na' gwzolaozən dezd tyemp cḥe de'e Adannə' bžinte tyemp cḥe de'e Moisezən' benən byen yoguə' beṇə' gwsa'ate' can' chsa'ate' na'a, cḥedə' yogue'e gwso'one' de'e malən', la'anə'əczə de'e mal de'en gwso'one' bito naquən ca de'e

mal de'en ben de'e Adannə'. De'e Adan na'anə' bedəyene' par nich gwxe yelə' gotən' yežlyo nga, pero na' Jesocristən' ben' banaquəczən yidə dezd cana'ateczə, le'enə' bedəyene' par nich de yelə' mban zejlicane che notə'ətezcho chonlilažə'əchone'.

15 De'e xen nža' yelə' goclen de'en ben Diozən' len chio'o catə'an bsele'e Jesocristən' na' ca de'e malən' de'en ben de'e Adannə'. Por ni che de'e malən' de'en ben de'e Adannə' beṇə' zan gwsa'at. Pero na' Diozən' bene' to de'e zaque'e, bene' to yelə' ži'ilažə' xen na' to yelə' goclen xen par beṇə' zan. Diozən' chaclene' chio'o ca de'en bsele'e Jesocristən' par cheyašə' cheži'ilaže'e yoguə' chio'o beṇə'ch.

16 Nža' de'e malən' de'en ben de'e Adannə' ca goclen de'en ben Diozən' len beṇə'chən'. Por ni che de'e malən' de'en ben de'e Adannə', de'e na'anə' Diozən' gwchoglaogüe'en che chio'o beṇə'ch de que si'icho castigw zejlicane. Pero na' dadzən' goclen Diozən' chio'o ca de'en bsele'e Xi'ine' Jesocristən', na' chio'o chonlilažə'əchone' ne' de que naccho beṇə' güen laogüe'enə' la'anə'əczə babencho de'e zan de'e mal.

17 Por ni che tozə be'enə' ben de'e malən' de yelə' got che chio'o beṇə'ch. Pero na' Diozən' lechgualə nži'ilaže'e chio'o, na' dadzə ne' che chio'o chonlilažə'əchone' de que naccho beṇə' güen laogüe'enə'. De'e na'anə' de yelə' mban checho zejlicane na' nabi'acho txen len Jesocristən'.

18 Can' naquən, por ni che de'e mal de'en ben de'e Adannə', Diozən' gwchoglaogüe'en de que to to chio'o beṇə'ch si'icho castigw che xtolə'əchon'. Na' por ni che de'en naquə Jesocristən' beṇə'

güen lao Diozən', Dioz na'anə' ne' che yoguə' chio'o chonlilažə'əcho Jesocristən' de que naccho beṇə' güen laogüe'enə' na' chone' chio'o yelə' mban zejlicane.

¹⁹ Na' de'en cui əbzenag de'e Adannə' che Diozən', de'e na'anə' yoguə' chio'o beṇəch naccho beṇə' güen de'e mal. Pero na' de'en əbzenag Jesocristən' che Diozən', yoguə' chio'o chonlilažə'əcho Jesocristən' naccho beṇə' güen lao Diozən'.

²⁰ Diozən' gwdixjue' lei che'enə' na' de'e na'anə' gwcha'o gwxenč de'e malən' chedə' beṇəchən' bito boso'ozenague' chei. Pero catə' gwcha'o gwxen de'e malən', de'e xen gwcha'o gwxenč yelə' ži'ilažə' che Diozən' par nič bezi'ixene' che chio'o chonlilažə'əchone'.

²¹ Gwcha'o gwxenč yelə' ži'ilažə' che'enə' par nič gwaquə əne' che yoguə' chio'o beṇəch de que naccho beṇə' güen laogüe'enə' šə gonlilažə'əcho Xancho Jesocristən'. Na' can' de yelə' got che yoguə' chio'o beṇəch de'en naccho beṇə' güen de'e malən' lecə nži'ilažə' Diozən' yoguə' chio'o beṇəch na' chone' chio'o yelə' mban zejlicane šə chonlilažə'əchone'.

6

Diozən' bene' par nič cuich šo'o čhazcho de'e malən'

¹ ¿Nacxan' cheyalə' goncho na'a baṇezecho de que nži'ilažə' Diozən' chio'o? ¿Econ šejczcho goncho de'e malən' par nič yezi'ixentezə yezi'ixen Diozən' chechon'?

2 Caguə can' cheyalə' goncho. Diozən' babene' par niç cuich šo'o çhazcho de'e malən' šə gwzenagcho che'. De'e nan' bito cheyalə' sochcho əgwzenagcho che la'ažda'omalchon'.

3 Bagwchoacho nisən' par niç ca' nacbia' de que ngodə'əcho txen len Jesocristən'. Na' ca de'en gwchoacho nisən' zejen ca gotcho len Crist na'anə'.

4 Na' de'en zejen ca gotcho len Cristən', leczə zejen ca bgašə'əcho len le'. Goc ca' par niç ca de'en bolis bosban Xacho Diozən' le' len yelə' guac xen che'enə', gwša'acho yelə' chzo yelə' chbez chechon' na' socho ca beṇə' cobə.

5 Ndil ngodə'əcho Cristən' txennə' catə'an gwso'ote'ene', na' leczə ndil ngodə'əcho le' txennə' catə'an beyas bebane' ladjo beṇə' guat ca'. De'e na'anə' cheyalə' yocobə xbab chechon' par niç gaquə yichjla'ažda'ochon' can' naquə yichjla'aždaogüe'enə'.

6 Ca de'en ndil ngodə'əcho Cristən' txen catə'an gwso'ote'ene' le'e yag corozən', zejen de que la'ažda'omalchon' gotən. Gotən par niç bitoch ṇabia'an chio'o na' par niç bitoch šo'o çhaz de'e malən' yichjla'ažda'ochon'.

7 Beṇə' bagot bitoch chnabia' la'ažda'omalen' le'.

8 Na' ca naquə gotlencho Cristən' chejle'echo de que zocho mbancho len le' na' de que sochcho əbancho len le'.

9 Nezecho de que Dioz nan' bosbane' Cristən' ladjo beṇə' guat ca'. Na' bitoch so'ote'ene' de'e yoblə. Yelə' gotən' bitoch soin le' de'e yoblə.

10 Ca de'en gwso'ote' Cristən', tši'izən' bnežjw cuine' par niç bebeje' chio'o xni'a de'e malən'.

Bitoch so'ote' le' yetlas. Na' na'a zoe' chnežjue' Diozən' yelə' bala'an.

11 Legon xbab de que Diozən' babene' par nich cuich šo'o chazcho de'e malən'. Pero na' leczə legon xbab de que ndil ngodə'əcho txen len Cristən' catə'an beyas bebane' ladjo beṇə' guat ca'. De'e na'anə' mbancho par əgwnežjwcho Diozən' yelə' bala'an. Gonle xbabən' ca' chedə' ngodə'əcho txen len Xancho Cristo Jeso'osən'.

12 Bito güe'echo latjə šo'o chaz de'e malən' cuerp chechon' de'en gat par goncho ca de'e malən' zelažə' la'ažda'ochon'.

13 Bito gon cuincho lao na' gwxiye'enə' par goncho de'e mal len cuerp chechon'. Cheyalə' gon cuincho lao na' Diozən' par goncho de'e güenṇə'. Gon cuincho lao ne'enə' chedə' bitoch naccho len yichjla'ažda'ochon' ca beṇə' guat, sino bade yelə' mban zejlicane chechon'.

14 Antslə goquecho goncho can' na lein', pero de'en cui goc goncho can' nannə', blo'in chio'o de que zocho xni'a de'e malən'. Pero na'a de'en nži'ilažə' Diozən' chio'o babebeje' chio'o xni'a de'e malən', na' de'e na'anə' chac chon cuincho lao ne'enə' par goncho de'e güenṇə'.

Cheyalə' cuejyichjcho cuich goncho de'e malən'

15 ¿Egontezcho de'e malən' de'en nezecho nži'ilažə' Diozən' chio'o na' de'en bito chebeine' chio'o por ni che šə choncho can' na lei che'enə'? Bitō.

16 Nezecho catə' chzenagcho che to beṇə' na' catə' cho'echo latjə chnabi'e chio'o, xni'a be'enan' zocho. Na' leczə ca' šə chdalenczcho de'e malən' na' chzenagcho chei, xni'ei nan' zocho na' bito žjəyecho len Diozən' šə ca'. Pero šə chon cuincho

lao na' Diozən' na' chzenagcho che' nachən' zdacz-
cho choncho de'e güennə'.

¹⁷ Antslən' gwzochō xni'a de'e malən'. Pero choxcwlen Diozən' lenczə le'e bachzenagle na'a do yichj do lažə'əle de'en bablo'ito' le'e.

¹⁸ Diozən' babebeje' chio'o xni'a de'e malən'. De'e na'anə' banon cuincho lao na' Diozən' par šejcho goncho de'e güennə'.

¹⁹ Cho'a dižə'anə' can' zocho xni'a non' chzenag-
cho chei par ničh šejni'ile. Ca'atezən' ben cuinle
lao na' gwxiye'enə' par benle de'en naquə yelə' zto'
na' bichlə de'en bito cheyalə' goncho, leczə can'
cheyalə' gon cuincho lao na' Diozən' par goncho
de'e güennə' ničh gaquə yichjla'ažda'ochon' güen
can' naquə yichjla'aždao' Diozən'.

²⁰ Catə'an ne'e zocho xni'a de'e malən', bito
bzenagcho che Diozən' par goncho de'e güen.

²¹ Na' bitobi de'e güen ble'icho lao de'e mal ca'
de'en jənaochonə'. Bacheto'icho na'a che de'e ca'
benchonə'. Žalə' chonchcho de'e mal ca' zjənac ca'
bito žjəyecho len Diozən'.

²² Pero Diozən' babebeje' chio'o xni'a de'e malən'
na' babene' par ničh non cuincho lao ne'enə'. De'e
na'anə' zda chaquəch yichjla'ažda'ochonə' can'
naquə yichjla'aždao' le'enə' na' žjəyecho len
Diozən' zejlicane.

²³ Šə zocho choncho de'e malən' yeyejcho lao
yi' gabilən'. Pero šə ngodə'əcho txen len Xancho
Cristo Jeso'osən', Diozən' chone' chio'o dadzə yelə'
mban zejlicanen'.

Lein' chnabi'an beṇachən' žlac zjəmbane'

¹ Beṇə' bišə' le'e nombi'ale lein' na' nezele de que lein' chnabi'an chio'o žlac mbancho na'azə.

² To no'olə csad, žlac mban be'en che'enə' cheyalə' soe' len le', la' can' chon lein' mendad. Xte catə'əch gat be'en che'enə' cana'achən' babechoj latje' len lei de'en chon mendad soe' len be'en che'enə'.

³ Na' šə no'olən' yeque'e beṇə' yoblə len mban be'en che'enə', beṇə' ggo'o xtoin' naque'. Pero šə bagot be'en che'enə' babechoj latje' len lein'. Guaquə yošagna'alene' beṇə' yoblə, na' bito nacho naque' beṇə' ggo'o xtoi laogüe de'en yošagne'e de'e yoblə.

⁴ Can' naquən beṇə' bišə', ngodə'əcho txen len Cristən', na' de'e bnežjw cuine' gwso'ote'ene', de'e na'anə' baṇezecho bito chaccho beṇə' güen lao Diozən' por ni che choncho bi de'en na lei de'en bzoj de'e Moisezən'. Cristən' beyas bebane' ladjo beṇə' guat ca' na' chio'o baben cuincho lao ne'enə' par nič goncho can' chene'e Diozən'.

⁵ Antslə nezocho chzenagcho che la'ažda'omalchon'. Na' catə'ən gwnezecho ca de'en non lei de'en bzoj de'e Moisezən' mendad goncho, nachlə be'elažə'əchcho bzenagcho che de'e malən' de'en yo'o yičjla'ažda'ochonə' na' bencho con can' gone'echo. Žalə' ne'e choncho ca' bito žjəyezochō len Diozən'.

⁶ Pero na'a babocobə Spirit che Diozən' yičjla'ažda'ochon' na' nezecho bito chaccho beṇə' güen lao Diozən' por ni che choncho bi de'en na lein'. Antslə bencho bi de'e güen parzə nič goncho complir can' byoj lein' gwłalte nan naquən cheyalə'

goncho. Pero na'a choncho can' chene'e Diozən' chedə' babocobə Spirit che'enə' yichjla'ažda'ochon'.

Yo'o de'e malən' yichjla'ažda'ochon'

⁷ Bito cheyalə' goncho xbab de que lei de'en bzoj de'e Moisezən' naquən de'e mal. Bito gocbe'ida' nda' chona' de'e malən' žalə' cui bzejni'i lein' nada' bi de'en cui cheyalə' gona'. Na' bito əgwņezda' de que de'e malən' chona' chzelaža'a bitə'ətezə de'e de che beŋə' žalə' que lein' nan: "Bito selažə'əle bitə'ətezə de'e de che beŋə'."

⁸ Nach catə' gwņezda' can' na lein, de'e mal de'en yo'o yichjla'aždaogua'anə' nachle benən ca gwzelažə'əcha'. Na' bito gocbe'ida' de xtoła'a žalə' cui bemb'i'a lein'.

⁹ Gwzoa' to tyemp sin cui bemb'i'a lei de'en bzoj de'e Moisezən'. Pero catə' gwņezda' bin' nonən mendad gona', nachle bzenaguəcha' che de'e malən' de'en yo'o yichjla'ažda'ogua'anə'. De'e na'anə' gwņezda' si'a castigw zejlicane che xtoła'a.

¹⁰ Na' ca naquə lei de'en bzoj de'e Moisezən', naquən par gwzenaga' chei nich ca' gatə' yelə' mban zejlicane chia'. Pero de'en cui bzenaga' chei de'e na'anə' gwņezda' si'a castigw zejlicane.

¹¹ Ca de'en nombi'a lein', de'e malən' de'en yo'o yichjla'aždaogua'anə' bxoayaguən nada', benən ca bito bzenaga' che de'en nonən mendad gona'. Na' de'e na'anə' gwņezda' si'a castigw zejlicane che xtoła'anə'.

¹² Ca naquə lei de'en bzoj de'e Moisezən', za'an che Diozən'. To to de'en nonən mendad goncho za'an che Diozən' na' zjənaquən de'e licha na' de'e güen.

13 ¿Elei de'en naquə de'e güennə' benən par niç si'a castigw zejlicane che xtolā'anə'? Bitō naquə len. De'e malən' de'en yo'o yichjla'aždaogua'anə' bito be'en latjə gona' can' cheyalə' gona'. Na' de'en cui chona' can' na lein', de'e nan' gwnezdā' si'a castigw zejlicane che xtolā'anə'. Ca chac nan' nla'alaon naca' beṇə' mal de'en cui chona' can' na lein', na' nla'alaon de que de'e mal juisyən' chona' cui chona' can' none' mendad gona'.

14 Naquən clar de que lein' gwaquəlenən nada' len xbab de'en yo'o lo'o yichjla'aždaogua'anə' žalə' chzenaga' chei. Pero nada' naca' beṇə' la'aždao' mal, zoa' yo'o yaza' de'e malən'.

15 Bitō chona' de'e güen de'en che'enda' gona'. De'e mal de'en cui che'enda' gona' lelənnə' chona'. Bitō cheyache'ida' chia' bixchen' chona' ca'.

16 Che'enda' gona' can' na lei de'en bzoj de'e Moisezən', pero bito chona'an yoguə' las. Na' catə' cui chona' can' nanṇə' lechgualē de'e chacda', chedə' nezdā' lein' naquən de'e güen.

17 Caguə nada'anə' chona' de'en cui che'enda' gona'. De'e mal de'en yo'o yichjla'aždaogua'a nan' chonən par niç chona' de'en cui che'enda' gona'.

18-19 Nezdā' bito naca' beṇə' güen, chedə' yo'o de'e malən' lo'o yichjla'aždaogua'anə'. Che'enda' gona' de'e güennə', pero bito chona'an. De'e mal de'en cui che'enda' gona' lelənnə' chona'.

20 Na' ca de'en chona' de'en cui che'enda' gona', caguə chona'an nada'anə'. De'e mal de'en yo'o yichjla'aždaogua'a nan' nžiguə'ən nada' chona' de'e mal de'en cui che'enda' gona'.

21 Na' syempr catə'ən che'enda' gona' de'e güennə', de'e mal de'en yo'o yichjla'aždaogua'anə'

chžonən gona'an.

²² Chebeida' lei che Diozən' lo'o yichjla'aždaogua'anə'.

²³ Pero na' chacbe'ida' de de'en yo'o yichjla'aždaogua'anə' de'en cui cho'en latjə gona' can' nezda' cheyalə' gona'. De'e mal de'en yo'o yaz cuerp chia'anə' chnabi'an nada'.

²⁴⁻²⁵ Lo'o yichjla'ažda'ochon' chene'echo goncho de'en non lei che Diozən' mendad goncho, pero na' la'ažda'omalchon' chonczən ca choncho de'e malən'. ¡Prob chio'o! ¿No soi la'ažda'omalchon' de'enə' chnabia' chio'o? Nezecho si'icho castigw zejlicane šə soczcho gwzenagcho chei. Choxcwlen Diozən', chone' par nič Xancho Jesocristən' soine' la'ažda'omalchon'.

8

Cheyalə' goncho can' chene'e Spirit che Diozən'

¹ De'e na'anə' Diozən' ne' che chio'o šə ngoda'əcho txen len Cristo Jeso'osən' de que bito bi xtolə'əcho de. Chio'o ngoda'əcho txen len Cristo Jeso'osən' bachoncho can' chene'e Spirit che Diozən'. Bito choncho can' na la'ažda'omalchon'.

² Nezda' Spirit che Diozən' chnabi'an nada' na' chonən yelə' mban zejlicane chia' laogüe de'en ngoda'a txen len Cristo Jeso'osən'. Catə' gwzoa' xni'a de'e malən' lennə' benən par nič gwchoglaio Diozən' chia' si'a castigw zejlicane. Pero Spirit che Diozən' babebejən nada' xni'a de'e malən'.

³⁻⁴ Lei de'en bzoj de'e Moisezən' bito gwzoin par yebejən chio'o xni'a de'e malən' chedə' naccho benə' la'aždao' mal. Diozən' gwzoine' bebeje' chio'o xni'a de'e malən' de'en bsele'e Xi'ine'en golje'

yežlyo nga, gocczə cuerp che'enə' ca cuerp che chio'o beṇə' güen de'e mal. Na' Xi'in Dioz na'anə' gwdixjue' xtolə'əchon' par niḥ chio'o beṇəḥ gwaquə yechojcho xni'a de'e malən' na' gwaquə šejcho liḥa goncho can' non lein' mendad, con šə goncho can' chene'e Spirit che Diozən' na' bito goncho can' na la'ažda'omalchon'.

⁵ Šə zoczcho choncho can' na la'ažda'omalchonə', yo'o yiḥjcho de'en chene'en goncho. Pero šə zocho choncho can' na Spirit che Diozən' yo'o yiḥjcho can' nan na'anə'.

⁶ Na' šə con yo'o yiḥjcho de'en chene'e la'ažda'omalchonə', si'icho castigw zejlicane. Pero šə con yo'o yiḥjcho de'enə' chene'e Spirit che Diozən', guatə' yelə' mban zejlicane checho na' so cuezcho binlo len xbab de'en yo'o lo'o yiḥjla'ažda'ochonə'.

⁷ Contr Dioz nan' choncho šə con yo'o yiḥjcho de'en chene'e la'ažda'omalchon' goncho. Na' šə con yo'o yiḥjcho len, bito chzenagcho che lei che Diozən', na' niqwe gaquəczə gwzenagcho che Diozən' šə ca'.

⁸ Šə zocho choncho can' na la'ažda'omalchon' bito gaquə naquəchlə goncho par niḥ yebei Diozən' chio'o.

⁹ Pero chio'o ža, šə zo Spirit che Diozən' lo'o la'ažda'ochonə', bitoch zocho choncho can' na la'ažda'omalchon', sino zocho chzenagcho che Spiritən'. Na' šə cui zo Spirit che Cristən' lo'o la'ažda'ochonə', de'en leczə naquən Spirit che Diozən', bito naccho xi'in Dioz.

¹⁰ Cristən' zoe' len chio'o chonlilažə'əchone', na' Diozən' ne' de que naccho beṇə' güen laogüe'enə'. Na' de'e na'anə' de yelə' mban zejlicane checho

la'anə'əczə gatcho len cuerp chechon' por ni che de'e malən'.

11 Diozən' bolis bosbane' Cristo Jeso'osən' ladjo beṇə' guatən'. Na' šə Spirit che Diozən' zon lo'o la'ažda'ochon', leczə gwžin ža catə' Diozən' yolis yosbane' chio'o len cuerp checho quinga de'enə' sa'at. Yolīs yosbane' chio'o chedə' yo'o Spirit che'enə' lo'o la'ažda'ochon'.

12 Can' ža beṇə' bišə', bito cheyalə' goncho can' na la'ažda'omalchon'.

13 Si'icho castigw zejlicane šə zoczcho choncho de'en chene'e la'ažda'omalchonə'. Pero šə güe'echo latjə gaquəlen Spirit che Diozən' chio'o par nič cuich gwzenagcho che la'ažda'omalchon', nachən' gatə' yelə' mban zejlicane checho.

14 Na' yoguə' chio'o šə chzenagcho che de'en chsed chzejni'i Spirit che Diozən' chio'o goncho, naccho xi'in Dioz.

15 Diozən' beṇe' chio'o Spirit che'enə' catə'an gwcue'e chio'o ca xi'ine'. Na' de'e na'anə' bito chžebcho Diozən' can' chžebcho to beṇə' znia catə' choncho xšine'enə'. Lgua'a žebchone' cholgüižchone' che'echone': "Xa."

16 Spirit che Diozən' nan lo'o yichjla'ažda'ochon' de que chio'o naccho xi'in Dioz.

17 Na' šə naccho xi'in Dioz, gwžin ža catə' yoguə' de'en de che Cristən' gaquən checho txen lencho le'. Gaquən checho con šə gwsanlažə' cuincho yoso'oči' yoso'osaquə' beṇə' chio'o por ni che de'en chonlilažə'əcho Cristən', can' boso'oči' boso'osaque'e le'enə'. Na' šə yoso'oči' yoso'osaque'e chio'o, Diozən' gone' chio'o yelə' bala'an xen ca de'en babnežjue' che Cristən'.

18 Yežlyo nga de de'en chzaquə'əzi' chzaquə'əyašə'əcho. Pero nada' chona' xbab caguə de'e bi de'enə' ca de'en yebeicho catə'an əžin ža goṅ Diozən' chio'o yelə' bala'an xen ca de'en napə Cristən'.

19 Diozən' bene' beṅač, bene' bia chsa'aš na' bene' cuantzə bi de'en zjəde. Na' yoguə'əcho len lega'aquən bazochō lao juisy batə'əquən' goṅ Diozən' yelə' bala'an de'en si' chio'o naccho xi'inē', na' leczə len yoguə' bia ca' chsa'aš chəsə'əbezəb batə'əquən' əžin ža gone' ca'.

20 Na' yoguə' de'e ca' ben Diozən' caguə zjənac ša'onə'. Na' caguə con ca gwse'ene'enṅə' zjənaquən. Ze'e gonša'oche' lega'aquənṅə', na' ze'e gonša'oche' yoguə' bia chsa'aš na' leczə ca' chio'o beṅač. Na' leczə Dioz nan' bene' par nič chəsə'əbezən na' par nič chəsə'əbezə beṅačən' na' par nič leczə chəsə'əbezə bia ca' chsa'aš.

21 Chəsə'əbezən batə'əquən' əžin ža yesyə'əyaquən binlo juisy na' bito te čhega'aquən. Na' leczə can' chəsə'əbezə bia ca' əsa'ac čhega'aquəb. Na' ca'aczən' gac čhe chio'o naccho xi'in Dioz, catə'an si'icho yelə' bala'an xen de'en goṅ Diozən' chio'o, yeyac cuerp čhechon' de'e cobə na' cuatəch soi yelə' gotən' chio'o.

22 Na' nezecho, xte ža neža yoguə' de'e ca' ben Diozən' chso'onən ca beṅə' chbežgüe', chəsə'əžaglaon ca to no'olə beṅə' chzan. Na' leczə yoguə' bia ca' chsa'aš chəsə'əbežgüe'eb chəsə'əžaglaob ca to no'olə beṅə' chzan.

23 Na' caguə de'e ca'azən'. Leczə len chio'o chbežgüe'echo. Diozən' babene' chio'o Spirit čhe'enə' par nič nezecho gwžin ža gaquəch güen

checho. Na' chbežgüe'echo lo'o la'ažda'ochon' chbezcho batə'əquən' gon Diozən' cuerp cobə chechon' par əgwlo'e de que banque'e chio'o ca xi'ine'.

²⁴ Catə'ən bebej Diozən' chio'o xni'a de'e malən', ca nan' gwzolao chbezcho gwžin ža gaquəch güen checho. To de'e bagoc bitoch socho lez cuezcho gaquən. Notono zo no nezoe' lez gaquə de'en nezene' bagoc.

²⁵ Pero ca naquə de'en zocho lez gwžin ža gaquəch güen checho, zocho chgo'o chchejlažə'əcho batə'əquən' gaquən.

²⁶ Ca naquə Spirit che Diozən' zon chaclenən chio'o chedə' bitotec bi chac goncho sin cui zon len chio'o. Bito chac goncho orasyon can' cheyałə' gonchon, poro na' Spirit che Diozən' chnen fabor chio'o laogüe'enə' la'anə'əczə cui cheželecho naclə güe'elenchone' dižə' che de'en chnalažə'əcho.

²⁷ Na' Diozən' ngüia nye' la'ažda'ochon' na' leczə ca' chejni'ine' bin' chene'e Spirit che'enə' catə'ən chnen fabor chio'o bagwleje' par naccho lažə' ne'enə'. Na' can' chene'e Diozən' nen fabor chio'o.

Diozən' de'e chio'o, de'e na'anə' notono no soi chio'o

²⁸ Na' nezecho de que lao yoguə' de'en chaquən', Diozən' chone' par nič gaquə güen che chio'o chaquecho che'. Chio'on bač gwleje' par chonlilažə'əchone' segon can' gwchoglaogüe'en.

²⁹ Nombia' Diozən' chio'o dezd gwłalte, na' əbsi'e xneze par nič tozə gaquə yičjla'ažda'ochon' len yičjla'aždao' Xi'ine' Jesocristən'. Bene' par nič Jesocristən' naque' beņə' nech entr chio'o beņə' biše'e zan.

30 Na' ca naquə əbsi' Diozən' xneze par nič gaquə yichjla'ažda'ochon' tozə len yichjla'aždao' Xi'ine' Jesocristən', leczə gwleje' chio'o par chonlilažə'əchone' na' bagwchoglaogüe'en checho de que naccho beṇə' güen laogüe'enə'. Na' leczə can' goncze' chio'o yelə' bala'anə'.

31 Catec güennə' chon Diozən' len chio'o de'en bsi'e xneze gac checho yoguə' de'e ca'. Na' nezecho Diozən' de'e chio'o, na' de'e na'anə' notono no soi chio'o.

32 Diozən' bito bžone' saquə'əzi' Xi'ine'enə' por ni che yoguə'əloj chio'o ca de'en bsele'ene' gwso'ot beṇə' le'. Na' can' bsele'e Xi'ine' Jesocristən' par chio'o, ca'aczən' gone' yoguə' de'e güennə' dadzə len chio'o.

33 Diozən' bagwleje' chio'o par naccho xi'ine' na' bagwchoglaogüe'en checho de que bito bi xtolə'əcho de. De'e na'anə' notono no soi əgwcuış chio'o laogüe'enə'.

34 Notono zo no gaquə gon par nič əna Diozən' checho de que de xtolə'əchon'. Por ni chechon' bsanlažə' cuin Cristən' gwso'ot beṇə' le' na' Diozən' bolis bosbane'ene' ladjo beṇə' guat ca'. Na' ṇa'a chi'e cuit Diozən' chnabi'e txen len le', na' chṇe' fabor chio'o.

35 ¿Ede de'e əgwžon par nič Cristən' cuich gaquene' checho? ¿Egwžon no de'e mal de'en gaquə checho? ¿Egwžon no de'e yašə' de'e zi' de'e gaquə checho? ¿Egwžon no yelə' xi'a che beṇə' chgue'i chio'o? ¿Egwžon no yelə' chbił chdon checho? ¿Egwžon laogüe de'en cui de xala'ancho? ¿Egwžon šə bi lxož de'e za' len chio'o? ¿Egwžon par nič Cristən' cuich gaquene' checho šə to beṇə'əclə

noxe'e cwšiyən' gote' chio'o? Bitobi bi de de'e əgwžon par ničh Cristən' cuich gaquene' checho.

³⁶ Can' nyojczə Xtižə' Diozən' nan:

Por ni che chonlilažə'əto' le', chse'ene beṇə' so'ote' neto' do tyempte.

Chso'one' xbab de que neto' naquəto' ca to xilə' bia so'ote'.

³⁷ Pero catə'ən za'ac bi de'e mal gac checho, bito chac chop lažə'əcho, sino chebeichgüeicho la' nezecho zoczə Cristən' chaquene' chechon'.

³⁸ Nada' nezda' de que notono gaquə gwžon par ničh Diozən' len Cristən' cuich əsa'aquene' checho. Yelə' gotən' bito gaquə bi gonən, ni yelə' mbannə', ni no angl bzelao, ni nochlə beṇə' blao che angl bzelao, ni angl bzelao beṇə' gwnabia', ni de'e chac checho na'a na' šə bichlə de'e ze'e za'ac.

³⁹ Ni de'e de le'e yoban', ni de'e de gabilən', ni bichlə de'en ben Diozən' bito gaquə yesə'əžonən par ničh Diozən' cuich gaquene' checho. Nic yesə'əžon no beṇə', nic yesə'əžon bitə'ətezə de'e gac checho par ničh Diozən' cuich gaquene' checho, la' Diozən' bsele'e Xancho Cristo Jeso'osən' blo'ine' chio'o can' chaquene' checho.

9

Diozən' gwcue'e beṇə' Izrael ca xi'ine'

¹⁻² De'en ngoda'a txen len Cristən' cho'a dižə' li nia' de que zochgua trist, na' chacchgüeida' lo'o la'ažda'ogua'anə' ca naquə zan beṇə' gwlaž chia' ca' bito chso'onlilaže'e Cristən'. Spirit che Diozən' chonən par ničh nezda' lo'o yichjla'ažda'ogua'anə' de que cho'a dižə' li catə' nia'

3 xte zelaža'a cuiayi'a žalə' na'anə' yecui'ižə' Diozən' nada' cuit Cristən' par nich beṇə' gwlaž chia' ca' so'onlilaže'ene'. Che'enda' so'onlilaže'ene' čhedə' lega'aque' gwsa'alje' zjənaque' beṇə' Izrael ca nada'.

4 Diozən' gwcue'e chio'o beṇə' Izrael ca xi'ine'. Na' gwzoe' len de'e xaxta'ocho ca' to lo'o bejw de'en chey che'eni'. Na' bene' lyebe gaquəlene' lega'aque'. Na' leczə bnežjue' lega'aque' lei de'en bzoj de'e Moisezən'. Na' Dioz nan' əblo'ine' lega'aque' naquən' se'ejni'alaže'ene'. Na' leczə benche' lyebe de'e bene' len lega'aque'.

5 Beṇə' golə blao beṇə' za' che'elte zjənaque' xaxtao' chio'o beṇə' Izrael. Cristən' ben' bselə' Diozən' par gaquəlene' beṇəchən' golje' lao dia che beṇə' Izrael. Le' naque' Dioz na' chnabi'e yoguə'əte, chnabi'e beṇəch na' bia ca' chsa'aš, na' yoguə'əloj cuantzə de'e zjəde. Cheyaļə socho güe'ela'ochone' zejlicane. Can' gonšgaccho.

6 Clelən' choncho xbabən' šə chaquecho de que Diozən' bito bene' complir ca lyebe de'en bene'. De'e li caguə yoguə' beṇə' ca' əgwsa'aljə lao dia che Izraelən' zjənaque' beṇə' Izrael lao Diozən'.

7 Na' caguə beṇə' ca' əgwsa'aljə lao dia che de'e Abraannə' chon Diozən' cuent zjənaque' xi'in dia che de'e Abraannə'. Quinga gož Diozən' Abraannə': "Xi'in dia che Isaac gona' cuent lao dia chio'onə'."

8 De'e nga chlo'in chio'o de que caguə ni che de'e goljcho lao dia che beṇə' Izraelən' naccho xi'in Dioz. Naccho xi'in Dioz čhedə' chejle'echo che lyebe de'en bene' len de'e Abraannə', gwne' de que əque'e ca xi'ine' con beṇə' so'onlilažə' le'.

9 Catə'an ben Diozən' lyebe len de'e Abraannə' gwne': "Leczə ca tyemp nga n̄a'a yida' yetgüiz, na' cana' bazo to bi'i che Sar ni."

10 Na' leczə be' Diozən' dižə' len de'e Rebequən' catə'an gwzoe' bi'e bi'i cuaš ca', xi'in de'e xaxta'ocho Isaaquən'.

11 Ze'e sa'aljlə bi'i cuaš ca'anə', na' ni de'e güen ni de'e mal cuiṇə' so'ombo'. Na' lao cuiṇə' gatə'əbia' naquən' so'ombo', gwlej Diozən' tobo' par gaquə güen chebo'. Con bagwchoglaogüe' can' gaquə chega'acbo' na' bene' can' bansi'e xnezen'.

12 De'e na'anə' gože' de'e Rebequən': "Bi'in galjə nech sobo' xni'a bi'in yedenao lebo'."

13 Na' nyojczə de'en gwna Diozən' che bi'i cuaš ca': "Chacda' che Jacobən' na' chgue'ida' Esa'on'."

14 Bito cheyalə' goncho xbab de que Diozən' bito zde' licha de'en gwne' ca'. Zdacze' lican'.

15 Ze' Diozən' de'e Moisezən': "Yeyašə'əlaža'a len beṇə' che'enda' yeyašə'əlaža'a, na' əži'ilaža'a len beṇə' che'enda' əži'ilaža'a."

16 Quinga naquən: Diozən' nži'ilaže'e chio'o caguə por ni che che'enecho əži'ilaže'e chio'onə'. Na' caguə por ni che zocho lao juisy əži'ilaže'e chio'onə' nži'ilaže'e.

17 Nyojczə Xtižə' Diozən' can' gože' de'e Rei Faraonnə': "Nada' bena' par ničh naco' rei parzə ničh gona' len le' ca yesə'əneze beṇə' can' naquə yelə' guac chia'anə'. Gona' par ničh yoguə'əlol beṇə' ža' yežlyon' yesə'ənezene' non' naca' nada'."

18 Can' naquən, Diozən' cheyašə'əlaže'e beṇə' chene'ene' yeyašə'əlaže'e, na' chone' par ničh nitə' beṇə' žod beṇə' chene'ene' cui yoso'ozenague' che'.

19 Na' de'en chon Diozən' ca' de repent chonle xbab nale: “Chio'o beṇach choncho con can' banžia' Diozən' bia'. ĵBixchen' ne' de xtolə'əchon?”

20 Pero ĵno naquə chio'on ža par gaquəyožcho Diozən'? ĵEgüe' to yesə' ben' ben len: “ĵBixche nga beno' nada' quinga?” Nezecho bito ye'en le' ca'.

21 Beṇə' güen yesə' xguaguən', chac gone' no yesə' par gonən žin len de'e naquə de'e xoche. Na' le'e gon' na'atezə leczə gone' yesə' par gonən žin len de'e cui naquə xoche.

22 Ca cheyalə'əczən' nžia' Diozən' bia' gwnežjue' castigw zejlicane che beṇə' ca' cui choso'ozenag che', na' can' nžie' bia' gone' bichlə par gwlo'ine' yelə' guac che'enə'. Na' de'e cheyalə'əczən' can' nžia' Diozən' bia' gone' chedə' bagwzoine' bagwdape' yelə' chxenlažə' len lega'aque' la'anə'əczə zjəzaque'e par yesə'əzi'e castigw zejlicanen', na' yesyə'əžine' lao yi' gabilən'.

23-24 Na' ca cheyalə'əczən' ca de'en bsi'e xnezenə' antslə par gone' chio'o chonlilažə'əchone' yelə' bala'an, chio'o cheyašə' cheži'ilažə'e. Bene' ca' par nič nacbia' lechguale de'e güen juisy chone' chaclene' chio'o gwleje' par chonlilažə'əchone' entr beṇə' Izrael na' entr beṇə' cui zjənaquə beṇə' Izrael.

25 Can' na le'e libr de'en bzoj de'e profet Oseasən', Diozən' gwne':

Beṇə' cui zjənaquə xi'ina' na' nia' lega'aque' xi'ina'.

Na' beṇə' ca' cui goquəda' chega'aque' yapəga'aca'ane' de que chacda' chega'aque'.

26 Na' leczə nan:

Gan' gož Diozən' beṇə' ca': “Le'e bito nacle xi'ina’”,

lēcə na'anə' ye'e lega'aque' de que zjənaque' xi'ine',
Dioz ben' zo zejlicane.

27 Lēcə can' gwna de'e profet Isaiazən' che beṇə'
Izrael ca': "La'anə'əczə chio'o beṇə' Izrael šancho
ca yox de'e chi' cho'a nisdao' balgachon' yechojcho
xni'a de'e malən'.

28 La' Xancho Diozən' gone' can' bančhoglaogüe'en
len chio'o beṇəç, na' to žalñez gone' yoguə'əlol
de'en bangüie' gone'."

29 Lēcə de'e Isaiazən' gwne' antslə:

Žalə' Xancho Diozən' ben' napə le'ezelaogüe yelə'
guac xen cui bocua'ane' to čhopə beṇə' lao
ṇasyon Izrael čechon',
can' goc che beṇə' Sodoma na' beṇə' Gomorra ca'
goc čecho žalə' ca'.

*Con beṇə' chso'onlilažə' Cristən' nchoglaon
čhega'aque' de que zjənaque' beṇə' güen lao Diozən'*

30 Quingan' naquən, beṇə' ca' cui zjənaquə
beṇə' Izrael bito besyə'əyilje' naclən' so'one' par
niç Diozən' əne' de que zjənaque' beṇə' güen
laogüe'enə', pero bale' baçh chso'onlilaže'e Cristən'
na' Diozən' ne' čhega'aque' de que zjənaque' beṇə'
güen laogüe'enə'.

31 Na' beṇə' Izrael ca' jəsə'ənaogüe' to lei de'e
chon mendad naclən' so'one' par niç əsa'aque'
beṇə' güen lao Diozən'. Pero bito gwso'one'
can' nanṇə'. De'e nan' Diozən' gwčhoglaogüe'en
čhega'aque' de que bito zjənaque' beṇə' güen
laogüe'enə'.

32 Na' gwčhoglaogüe'en čhega'aque' ca'
čhedə' caguə gwso'onlilaže'e Dioz na'anə' con
gwsa'aque' so'one' can' na lein' par niç

əsa'aque' beṇə' güen laogüe'enə'. De'e na'anə' gwxaquə'əlebəga'aque'ne' ca beṇə' jti'i to yej.

³³ Goc can' nyojczə Xtižə' Diozən' nan:

Gan' nzi' Sion na' əselā'a to beṇə' gwxaquə'əlebene' ca to yej de'e əčhego'o beṇə' na' ca to yej de'en zjəsə'əžo'e na' yesə'əbixə'.

Na' beṇə' so'onlilažə' ben' gwxaquə'əlebe ca yejən' bitobi zto' əsa'aque'ne' che de'en so'onlilaže'ene'.

10

¹ Beṇə' bišə', do yichj do laža'a che'enda' par nič beṇə' Izrael gwlaž chia' ca' yesyə'əchoje' xni'a de'e malən', na' de'e na'anə' chona' orasyon chṇaba' gaquəlen Diozən' lega'aque'.

² Nezda' can' chse'ene'ne' de'e zan de'e so'one' chsa'aque'ne' par yebei Diozən'. Pero bito zjəneze'ne' bin' chene'e Diozən'.

³ Bito chse'ejni'ine' naquən' baben Diozən' par nič ne' che beṇə' de que zjənaque' beṇə' güen laogüe'enə'. Le'e lega'acteze' chse'ene'ene' yesyə'əyilje' naquən' so'one' par nič əsa'aque' beṇə' güen lao Diozən'. Bito chse'ene'ene' so'onlilaže'ene' par nič əne' čhega'aque' de que zjənaque' beṇə' güen laogüe'enə'.

⁴ Pero notə'ətezə beṇə' chonlilažə' Cristən', Diozən' ne' che' de que naque' beṇə' güen laogüe'enə' la'anə'əczə šə cui chonyane'e can' na lein'.

⁵ De'e Moisezən' bzoje'en de que notə'ətezə beṇə' chone' cuaselol can' na lein' nachən' naque' beṇə' güen lao Diozən' na' gaquə bane' zejlicane'.

6-7 Pero nža'alən' nyoj Xtižə' Diozən' che beṇə' ca' na Diozən' zjənaquə beṇə' güen laogüe de'en chso'onlilaže'ene'. Nan: “Bito goncho xbab lo'o la'ažda'ochon' gaquecho: Notono no gaquə cue yoban' o notono no gaquə yetj gan' ža' beṇə' guat ca'”, žalə' na'aclə chyažjecho žjəxi'icho Cristən' nich gonlilažə'əchone'.

8 Na' leczə nyojən' nan: “Banombia'acho dižə' de'en chaclen chio'o. Choncho xbab chei na' cho'echo dižə' can' nan.” Na' lenṇə' dižə' de'en chzejni'ito' beṇə' par nič so'onlilaže'e Cristən'.

9 Quingan' cheyalə' goncho par nič Diozən' yebeje' chio'o xni'a de'e malən'. Cheyalə' güe'echo dižə' len beṇə' yoblə par nič yesə'ənezene' de que chonlilažə'əcho Xancho Jeso'osən', na' leczə cheyalə' šejle'echo do yičj do lažə'əcho de que Dioz nan' bolis bosbane' Jeso'osən' ladjo beṇə' guat ca'.

10 Diozən' ne' de que naccho beṇə' güen laogüe'enə' šə chejle'echo do yičj do lažə'əcho de que cuine'enə' bolis bosbane' Jeso'osən' ladjo beṇə' guat ca'. Na' šə cho'echo dižə' len beṇə' yoblə par nič yesə'ənezene' de que bachonlilažə'əcho Xancho Jeso'osən', nachən' Diozən' yebeje' chio'o xni'a de'e malən'.

11 Xtižə' Diozən' de'en nyojən' nan: “Notə'atezə beṇə' chso'onlilažə' Diozən' bitobi zto' sa'aquene' che de'en chso'onlilaže'ene'.”

12 Chio'o beṇə' Izrael na' chio'o cui naccho beṇə' Izrael, tozaczə can' chon Diozən' len yoguə'əcho, la' Xancho Jeso'osən' naque' Xan yoguə'əloj beṇə'. Le' lechgualə cheyašə' cheži'ilaže'e yoguə'əcho con šə chṇabcho gaquəlene' chio'o.

13 Can' na Xtižə' Diozən' de'en nyojən':

“Notə'ətezə beṇə' yesə'əṇab goclen laogua' nada' naca' Xanle, guaquəlencza' lega'aque'.”

14 Pero ḡnacxa so'on beṇə' yesə'əṇabe' goclen laogüe'enə' šə bito chso'onlilaže'ene'? Na' ḡnacxa so'one'en so'onlilaže'e le' šə cuiṇə' se'enene' xtiže'enə'? Na' ḡnacxa gaquə əse'enene' xtiže'e na'anə' šə cui zo beṇə' güe' xtiže'enə' len lega'aque'?

15 ḡNacxa so'on beṇə' yesə'əyixjui'e dižə'anə' šə bito zo no chselə' lega'aque' par yesə'əyixjui'en? Can' nyojczə Xtižə' Diozən' nan: “Chebeichgüeicho len beṇə' chesə'əyixjui'e guac socho binlo len Diozən', chesə'əyixjui'e dižə' güen dižə' cobə che'enə'.”

16 Pero la'anə'əczə catə' chse'ene beṇə' dižə' güen dižə' cobə che Diozən', caguə yogue'e choso'ozenague' chei. De'e Isiaazən' gwne': “Xana' casi notono no choso'ozenag dižə' de'en chyixjue'eto'onə'.”

17 Cheyalə' əse'ene beṇə' dižə' güen dižə' cobə de'en gwzejni'in lega'aque' che Cristən' par so'onlilaže'ene'.

18 Pero chṇaba': ḡəcabi ṇe'e se'ene beṇə' Izrael ca' dižə' güen dižə' cobə de'en chzejni'in che Cristən'? Baḥ gwse'enene'en. Baḥ chac can' nyoj Xtižə' Diozən' nan:

Doxenlə yežlyon' baḥ gosə' gwłaljə dižə'anə'.

Zbi'izcan yežlyon' babselə' Diozən' xtiže'enə'.

19 Na' chṇaba' de'e yoblə: ḡəcui gwse'ejni'i beṇə' Izrael ca' dižə' de'en chzejni'in che Crist na'anə'? Zse'ejni'iczene'en. De'e Moisezən' gwduxjui'e can' gwna Diozən', gwne':

Nada' Dioz gona' güen len beṇə' ca' cui zjənaquə ṇasyon chia'.

De'e na'anə' gue'ile lega'aque'.

Na' gona' güen len beṇə' ža' ṇasyon ca' beṇə' cui bi
chse'ejni'i,

na' de'e na'anə' əža'ale.

²⁰ Na' de'e profet Isaiazən' bito bžebe' gwdixjui'e
can' gwna Diozən':

Beṇə' cui besyə'əyilj nada', bedəsyə'ədi'e nada'.

Na' beṇə' cui gosə'əṇab nada', na' bena' par niḥ
gwsə'ombi'e nada'.

²¹ Na' de'e profet Isaiazən' leczə gwdixjui'e can'
gwna Diozən' che beṇə' Izrael ca', gwne': "Do
tyempte chaxa' beṇə' ca' cui choso'ozenag chia'
par niḥ yoso'ozenague'. Beṇə' žod beṇə' godenag
zjənaquəga'aque' len xtiža'anə'."

11

Diozən' bito bechojlaže'e beṇə' Izrael ca'

¹ Bito cheyaḷə' goncho xbab de que Diozən' be-
chojlaže'e chio'o naccho dia che Izraelən'. Leczə
beṇə' Izrael nada', za'a lao dia che de'e Abraam,
naca' xi'in xesoa de'e Benjamin.

² Bito bechojlažə' Diozən' chio'o naccho dia
che Izraelən', chio'on gwleje' gwłalte par nac-
cho ṇasyon che'enə'. Legon xbab can' nyojən
le'e libr Xtižə' Diozən' can' ben Liazən' orasyonṇə'
laogüe'enə' cana', gwne' contr beṇə' Izrael gwlaž
che', gwne':

³ "Bagwsə'ot beṇə' Izrael quinga profet chio' ca'
Xana'. Bagosə'əgo'oṇi'ane'e mes de yej chio' gan'
cheyaḷə' əso'elaogüe'e le'. Yetoga nada' zoa' na'
leczə chse'ene'ene' so'ote' nada'."

⁴ Pero Diozən' boži'en gože'ene': "Ne'e nitə' gaža
mil beṇə' bagwleja' par zjənaque' lažə' na'anə'

beṇə' cuiṇə' yesə'əzo xibe' to lao lgu'a lsaquə'
de'en chse'ejni'alažə' beṇə' de'en nzi' Baal."

⁵ Leczə can' naquən xte ža ņeža, la'anə'əczə bito
naccho beṇə' zan, pero Diozən' bagwleje' chio'o
par cho'ela'ochone' chedə' nži'ilaže'e chio'onə'.

⁶ Diozən' gwleje' chio'o par cho'ela'ochone'
chedə' chebeine' chaclene' chio'o. Gwleje' chio'o
caguə por ni che bichlə de'e güen de'en benchonə'.
Žalə' Diozən' gwleje' chio'o laogüe bencho de'e
güen, bito naquən con to goclenzə de'en gwleje'
chio'o.

⁷ Ca naquə beṇə' Izrael gwlaž chia' ca,
zane' bito besə'əželene' naclən' so'one' par
nič Diozən' yebeine' lega'aque'. Pero chio'o
chonlilažə'əcho Diozən', cuine'enə' gwleje'
chio'o par cho'ela'ochone' na' chebeine' chio'o,
la'anə'əczə beṇə' Izrael ca' yelə' bito gwse'ejni'ine'
bi'in chene'e Diozən'.

⁸ Chac chega'aque' canə' nyoj Xtižə' Diozən' nan:
"Diozən' bene' par nič zjənaque' ca beṇə' cuiczə
zjənanṇə' cuiczə zjəntei. Na' xte ža ņeža gw-
xaquə'əlebəga'aque' ca beṇə' cui chəsə'əle'i len
jlaoga'aquen' na' ca beṇə' ncuež nagga'aquen'."

⁹ Leczə bzoj de'e Dabin' gwne':

Gaquəšga yoguə' de'en chəsyə'əbeine'enə' ca to ga
gaon lega'aque'

na' ca to ga žjəsə'əxope' na' ca to ga sa'acšgue'
castigw.

¹⁰ Yesə'əcholšga yichjla'ažda'oga'aque'enə',

na' yedote yesə'əzaquə'əzi'išgue' can' chzaquə'əzi'
beṇə' nlegw cože'enə' no'e yoa' zi'i.

Diozən' babene' par niçh balə beṇə' cui zjənaquə beṇə' Izrael chso'onlilaž'e'ene'

¹¹ Ca naquə bagwyo'o yejən' ni'a beṇə' Izrael ca', bito cheyalə' goncho xbab de que leczə gosə'əbiḡe'enə'. Pero ca de'en cui boso'ozenague' che Diozən', goc ca' par niçh leczə le'e cui nacle beṇə' Izrael yechojle xni'a de'e malən' con le'e chonlilažə'əlene'. Na' leczə goc ca' par niçh beṇə' ca' cuiṇə' so'onlilažə' Diozən', beṇə' gwsa'aljə lao dia che Izraelən', yesə'əzelaže'e gon Diozən' len lega'aque' can' bachone' len le'e cui nacle beṇə' Izrael, le'e chonlilažə'əlene'.

¹² Na' ca de'en cui boso'ozenag beṇə' Izrael ca', goc ca' par niçh yeziquə'əchlə beṇə' ža' yežlyon' nite'e mbalaz šə so'onlilaž'e'e Diozən'. Na' ca de'en cuich chon Diozən' cuent che zan beṇə' Izrael ca' de que zjənaque' nasyon che'enə', goc ca' par niçh le'e cui nacle beṇə' Izrael zole mbalaz, le'e chonlilažə'əle Diozən'. Naquəchxa de'e mban' gaquə catə' yoguə'əloṭte beṇə' Izrael ca' so'one' ca yebei Diozən' lega'aque' de'e yoblə.

¹³ Le'e cui nacle beṇə' Izrael, che'enda' ənezele de que nada' naca' apostol che Diozən' na' bsele'e nada' cho'a xtiže'enə' entr le'e cui nacle beṇə' Izrael. Chona' xte ga zelao saquə'əda' par niçh zan le'e cui nacle beṇə' Izrael gonlilažə'əle Diozən'.

¹⁴ Chona'an par niçh leczə yeziquə'əchlə beṇə' Izrael gwlaž chia' ca' yesə'əzelaže'e gon Diozən' len lega'aque' can' chone' len le'e cui nacle beṇə' Izrael, na' con yoguə' no so'onlilažə' le', yebeje' lega'aque' xni'a de'e malən'.

¹⁵ Diozən' babnite'e zan beṇə' Izrael ca' ca'alə, na' laogüe de'en babnite'e lega'aque' ca'alə babozoe' zan le'e cui nacle beṇə' Izrael binlo len le'.

Pero na' gwžin ža catə' gon Diozən' ca yesə'əbiguə' beṇə' Izrael ca' len le' de'e yoblə. Na' lechgualē de'e mban' gaquə catə' baben Diozən' ca besyə'əbigue'e de'e yoblə len le'.

16 Nezecho de costumbr che chio'o beṇə' Izrael catə' choncho yetxtil chnežjwcho Diozən' to blol dao' cuazin', na' zejen de que dolol cuazi nan' naquən' che'. Can' naquən len chio'o beṇə' Izrael. Balcho banon Diozən' chio'o cuent ca xi'ine', pero na' chene'ene' de que yoguə'əcho gaccho xi'ine'. Na' catə' nacho de que to lo yag naquən che Diozən', leczə che' xoze'e ca'.

17 Chio'o beṇə' Izrael gwxaquə'əlebecho ca xozə' yag olibən' de'en naquə güen. Na' Diozən' bnite'e balcho ca'alə. Na' de'en bene' ca' gwxaquə'əleben ca de'en chon to beṇə' catə' chchogue' xozə' yaguən'. Na' yoguə' le'e cui nacle beṇə' Izrael gwxaquə'əlebele ca xozə' yag olibo de'en ze yixə', na' bene' le'e ca to yag de'e chone' injert, bozoe' le'e lao yag güennə'. Na' loin' noxə'ən le'e na' leczə noxə'ən xoze'e ca' yelə', na' xniže'in chguažə'ən le'e na' chguažə'əten xoze'e ca' yelə'.

18 Bito gaquēle de que naquəchle beṇə' güen cle ca beṇə' Izrael ca', beṇə' ca' gwxaquə'əlebəga'aque' ca xozə' yag de'en gwchoguən'. Caguə le'e chnežjwle yelə' mban che lo yag na'anə', sino que lo yag na'alən' chonən le'e yelə' mbannə'.

19 Le'e cui nacle beṇə' Izrael de repent nale: "Gwchogue' xozə' yaguən' par ničh bene' neto' injert."

20 Na' de'e liczə can' nalenə'. Na' laogüe de'e cui gwso'onlilažə' beṇə' Izrael ca' Dioz nan', bene' len lega'aque' ca xozə' yag de'en bagwchogue'enə'.

Na' babozoe' le'e lgua'a lega'aque' laogüe de'en chonlilažə'äle Cristən'. De'e nan' ža, bito gonle xbab de que Diozən' chebeichene' le'e cle ca beṇə' Izrael ca', sino leso legon xbab par sotezə sole gonlilažə'əlene'.

²¹ Diozən' bito gwzi'ixene' che beṇə' ca' chsaquə'əlebene' ca xozə' yaguən' de'en zjənaquə doalje, na' leczə bito si'ixene' che le'e šə bito sotezə sole gonlilažə'əlene'.

²² Legonšc xbab chele can' nži'ilažə' Diozən' beṇə' chso'onlilažə' le', na' can' chbejyichje' beṇə' cui chso'onlilaže'ene'. Diozən' gwlejyichje' beṇə' Izrael ca' besə'əxopə cui gwso'onlilaže'ene', na' nži'ilaže'e le'e cui nacle beṇə' Izrael laogüe de'en chonlilažə'əlene'. Pero šə cui sotezə sole gonlilažə'əlene', leczə cuejyichje' le'e.

²³ Na' de'e yoblə Diozən' yozoe' beṇə' Izrael ca' na' yeyone' lega'aque' injertar lao xozə' yaguən' šə so'onlilaže'e Cristən'. Diozən' nape' yelə' guac par gone' ca' len lega'aque'.

²⁴ Le'e nacle ca xožə' yag olibo de'e ze yixə', na' gwčhog Diozən' le'e, na' bene' le'e injertar bozoe' le'e lao xozə' yag olibo güennə'. Bezole gocle injertar lao xozə' yag olibo güennə', len caguə nacle xoze'e doaljen'. Nezecho leczə gwžin ža catə' yeyon Diozən' injertar de'e yoblə xozə' yag olibo de'e ca' zjənaquə xoze'e doalje.

Gwžin ža yebej Diozən' yoguə' beṇə' Izrael ca' xni'a de'e malən'

²⁵ Beṇə' bišə', che'enda' ənezele de'e nga de'e cui no gwneze antslə par nič cui gaquele de que yelə' beṇə' sin' chelen' nži'ilažə' Diozən' le'e.

Balə beṇə' Izrael ca' zjənaque' beṇə' yichj žod, bito chse'ejni'ine' bi'in chene'e Diozən'. Na' nic se'ejni'iczene'en xte que catə'əch əžin ža bačh de yelə' mban zējlicane che beṇə' ca' cui zjənaquə beṇə' Izrael, con yoguə' beṇə' ca' əgwnežjo Diozən' yelə' mban chega'aque'.

²⁶ Nach yoguə' beṇə' Izrael ca' yebej Diozən' lega'aque' xni'a de'e malən' can' nyojczə Xtiže'enə', nan:

To beṇə' syoda Sion yebeje' beṇə' xni'a de'e malən'. Na' yelə' güen de'e mal che xi'in dia che de'e Jacobən', le' yeque'en.

²⁷ Na' de'e ngan' chona' lyebe gona' len xi'in dia che de'e Jacobən', yeca'a de'e mal chega'aque'enə' de'en chso'one'enə'.

²⁸ Can' naquən. De'en chso'on beṇə' Izrael ca' contr Diozən', bito chse'ejle'e che dižə' güen dižə' cobə che'enə', de'e na'anə' Diozən' gwleje' le'e cui nacle beṇə' Izrael par gone' le'e cuent len nasyon che'enə'. Pero Diozən' chaquene' chega'aque' laogüe de'en gwleje' de'e xaxta'oga'aque'enə' par gwsa'aque' nasyon che'.

²⁹ Na' Diozən' bito cheyejene' che de'e ca' chnežjue' beṇə'chən', na' nic cheyejene' che beṇə' ca' mbeje' par zjənaque' nasyon che'enə'.

³⁰ Ca naquə le'e, antslə bito bzenagle che Diozən', pero na'a ža bachzenagle che' na' bacheyašə' cheži'ilaže'e le'e laogüe de'en cui boso'ozenag beṇə' Izrael ca' che'.

³¹ Diozən' cheyašə' cheži'ilaže'e le'e laogüe de'en cui choso'ozenag beṇə' Izrael ca'. Pero gwžin ža

catə' lɛczə yeyašə' yeži'ilažə'e beɲə' Izrael ca' de'e yoblə.

³² Diozən' gwlejšyichje' yoguə' beɲaɲən' par niɲ cui boso'ozenague' ɲhe'. Bene' ca' par niɲ lɛczə yeyašə' yeži'ilažə'e yoguə'əɫɔlga'aque'.

³³ Lɛchguale beɲə' sin' Diozən'. Nezene' yoguə'əɫɔl. Bito gaquə əɲezecho de'en nžie' bia' gaquə. Bito gaquə šejni'iyane'echo de'en chone'enə'.

³⁴ Nyoj Xtižə'enə' nan: “Bito gaquə əɲezecho yoguə' xbab ɲhe Xancho Diozən'. Bito bi de de'e əgwsed əgwlo'ichone' chio'o.”

³⁵ Na' nan: “Bito gaquə goncho byen ɲixjw Xancho Diozən' šə biclə de'e babe'echone'.”

³⁶ Diozən' bene' yoguə'əɫɔl, bene' bia chsa'aš, bene' beɲaɲ, na' yeziquə'əchlə de'e zjəde. Diozən' chgüia chye' yoguə'əɫɔl, chgüia chye' beɲaɲən' na' bia chsa'aš na' yoguə' cuantzə de'e zjəde. Len' bene' beɲaɲ na' yeziquə'əchlə de'e zjəde par niɲ si'e yelə' bala'an. Ledoye'ela'oche' zejlicane. Can' gonšgaczcho.

12

Cheyalə' gon cuincho lažə' na' Diozən'

¹ Beɲə' bišə', bacheyašə' cheži'ilažə' Diozən' chio'o. De'e na'anə' chneyoida' le'e legon cuerp ɲhelen' lažə' na' Diozən' ɲa'a mbanle. Le'e güe'en ca to regal. Cheyalə' gaccho beɲə' la'aždao' xi'ilažə' par niɲ gon cuincho lažə' na' Diozən' ɲhedə' can' cho'olažə'e. Šə choncho ca', do yichj do lažə'əchon' cho'ela'ochone'.

² Bito goncho can' chso'on beɲə' ca' cui zjənombia' Diozən'. Cheyalə' güe'echo latjə par niɲ

Diozən' gwše'e xbab c̄hechon', par niçh ənezecho bi'in chene'ene'. Diozən' chene'ene' goncho de'en naquə de'e güen na' con yoguə' de'en cho'olaže'e.

³ Diozən' bano'e c̄hia' naca' apostol na' de'e na'anə' zaquə'ən əñia' naquən' cheyalə' goncho. Bitō cheyalə' gon cuincho xen, sino que syempr goncho xbab de que no'e c̄he to tocho chonlilažə'əchone' bi xšine'enə' goncho na' bitō gaquə goncho xšine'enə' žalə' le' cui chaclene' chio'o.

⁴ Zan part nsa' cuerp c̄hechon'. Pero to to partən' caguə tozə žin de'e chso'onən.

⁵ Leczə can' naquən len chio'o. Beñə' zannə' naccho chonlilažə'əcho Cristən', pero yoguə'əcho ngodə'əcho txen len le' na' gwxaquə'əlebecho ca tozə cuerp.

⁶ Diozən' lao yelə' chaclen c̄hen' len chio'o, no'e c̄hecho de que gwde gwdele de'e gaquə gon to tocho. Šə balcho chac c̄hixjue'echo bi de'en bagwna Diozən' chio'o cheyalə' c̄hixjue'echon segon can' banoe' Diozən' c̄hecho laogüe de'en chonlilažə'əchone'.

⁷ Šə Diozən' bano'e c̄hecho gaquəlencho beñə', cheyalə' gaquəlenchone' do yichj do lažə'əcho. Na' šə Diozən' bano'e c̄hecho əgwšed əgwlo'icho beñə', cheyalə' əgwšed əgwlo'iga'aquechone' binlo.

⁸ Šə Diozən' bano'e c̄hecho əneyoicho beñə' yoblə par so'one' de'e güen, cheyalə' sotezə socho əneyoiga'aquechone'. Na' šə' bano'e c̄hecho bi de'e əgwnežjwcho beñə' yoblə, cheyalə' gwnežjwchon do yichj do lažə'əcho. Šə bano'e c̄hecho gaccho beñə' blao par əggüia əgwye ljuežj chio'o cho'ela'ochone',

cheyalə' cue' yichjcho par əggüia əgwyega'acchone' can' chene'e Diozən'. Šə noe' Diozən' checho yeyašə' yeži'ilažə'əcho beṇə' yoblə, cheyalə' yebeicho na' yeyašə' yeži'ilažə'əchone'.

Can' cheyalə' gon notə'ətezcho chonlilažə'əcho Cristən'

⁹ Cheyalə' gaque che ljuežjcho do yichj do lažə'əcho. Na' cheyalə' cuejyichjcho de'e malən' na' gue'ichon, par nič ca' zejli goncho de'e güenṇə'

¹⁰ Can' cheyalə' gaquecho che bišə' goljcho, ca'aczən' cheyalə' gaque che ljuežjcho. Cheyalə' gapəchcho respet beṇə' ljuežjcho clezə ca cuincho.

¹¹ Bito gaccho beṇə' xagüed. Do yichj do lažə'əcho goncho bitə'ətezə de'en goncho, con yoguə' de'en chene'e Xancho Diozən' goncho.

¹² Na' cheyalə' yebeicho chedə' nezecho soch Diozən' gone' güen len chio'o. Leczə cheyalə' co'o gwčhejlažə'əcho catə' chyi' chzaquə'əcho. Na' leczə cheyalə' gontezə goncho orasyon do tyempte.

¹³ Cheyalə' gaquəlencho šə bi de'e chesə'əyažje beṇə' ljuežjcho beṇə' ca' bagwlej Diozən' par zjənaque' lažə' ne'enə'. Na' cheyalə' yeyaše'echo beṇə' zitə'.

¹⁴ Cheyalə' ṇabcho gaquə de'e šao' de'e güen che beṇə' choso'očhi' choso'osaquə' chio'o. Cheyalə' ṇabcho gaquə de'e güen chega'aque', caguə de'e mal.

¹⁵ Cheyalə' yebeicho txen len beṇə' chəsyə'əbei. Cheyalə' cuežcho len beṇə' chəsə'əbež.

¹⁶ Yoguə'əcho cheyalə' goncho tozə xbab checho. Bito ga'alazə'əcho. Cheyalə' yolgüižcho beṇə' yašə' beṇə' cui bi chac, na' bito gon cuincho beṇə' sin'.

17 Šə bi de'e mal chon beṇə' len chio'o, bito əṇacho leczə de'e mal yoži'ichon len le'. Cheyalə' cue' yichjcho par niḥ goncho de'e güen, par niḥ yesə'əna yeziqə'əchlə beṇə' de que le naquəczə güen de'en chonchonə'.

18 Cheyalə' goncho xte ga zelao saquə'əcho par niḥ ca' socho binlo len yoguə'əlöl beṇə'.

19 Beṇə' bišə' dao', cheyalə' əgwzej əgwdecho ca'alə bitə'əzə de'en chso'one beṇə' chio'o. Gwyeczə Diozən' nac gone' len beṇə' ca' chḥi' chsaquə' chio'o. Xtiže'enə' nyojən nan: “Quinga na Xancho Diozən': Nadan' co'olaža'ane' na' nadan' gona'ane' castigw.”

20 Na' leczə nan: “Šə beṇə' contr chechonə' chbil chdone', cheyalə' güe'echone' de'e ye'ej de'e gaogüe'. Šə goncho güen len le' de repent lechgualə yeyejene' che de'e malən' chone' len chio'o.”

21 Catə' chso'on beṇə' de'e malən' len chio'o, bito güe'echo latjə ṇabia' de'e malən' chio'o par yoži'icho de'e mal len lega'aque'. Yoži'icho de'e güennə' len lega'aque' par niḥ yesyə'əyeyejene' che de'e malən' chso'one'.

13

1 To tocho cheyalə' əgwzenagcho che jostis ca' beṇə' ca' chəsə'əṇabia', chedə' Dioz nan' nite'e yoguə'əlölga'aque' par niḥ chəsə'əṇabi'e.

2 Šə bito chzenagcho che jostis ca', choncho contr de'en nžia Diozən' bia' goncho. Na' šə bito chzenagcho chega'aque', chyiljzə xtolə'əchon' par gaccho castigw.

3 Ca naquə jostis ca' beṇə' ca' chəsə'əṇabia', bito cheyalə' žebga'acchone' šə choncho de'e güen, pero

beṇə' ca' chso'on de'e mal, lega'aquen' cheyalə' yesə'əžebe' jostis ca'. Šə chene'echo socho sin cui žebcho jostis ca', cheyalə' goncho de'e güen par niĉ ca' yesə'əna jostis ca' de que de'e güennə' choncho.

⁴ Jostis ca' chso'one' xšin Diozən' par niĉ socho güen. Pero šə choncho de'e mal, cheyalə' žebga'acchone'. Caguə con zjəndolə'əlizene' yelə' chnabia' na'anə', par so'one' castigon' zjəndole'ene'en, ĉhedə' Diozən' banežjue'en ca xšin beṇə' jostis ca' chso'one' castigw beṇə' ca' chso'on de'e malən'.

⁵ De'e nan' cheyalə' əgwzenagcho ĉhe jostis ca' par niĉ cui si'icho castigw, na' leczə par niĉ gacbe'icho lo'o yiĉhĵla'ažda'ochon' de que de'e güennə' choncho.

⁶ Na' leczə de'e na'anə' cheyalə' ĉhixjwcho no ĉhe bien na' goncho no žinlao'. Con yoguə' de'e yoso'oĉhixjue' chio'o na' šə bi de'e yoso'ogone' chio'o, cheyalə' gwzenagcho ĉhega'aque' ĉhedə' Dioz nan' chone' mendad goncho ca'.

⁷ Ĉhixjwcho šə bi chalə'əcho ĉhe beṇə'. Šə chalə'əcho gwzon ĉhe beṇə', yogo'ochon. Šə chalə'əcho ĉhe bien, ĉhixjwchon. Šə chalə'əcho ĉhe impuest, ĉhixjwchon. Na' gapcho respet beṇə' cheyalə' ədap respet. Na' güe'ela'ocho beṇə' cheyalə' əye'elao'.

⁸ Ni to cui no galə'əcho ĉhei sin cui ĉhixjwchon. Na' de'en naquə de'e žialao goncho, gaquecho ĉhe sa'aljuežjcho tocho yetocho. Na' šə bachaque ĉhe sa'aljuežjchon', bachonczcho can' non lei ĉhe Diozən' mendad goncho.

⁹ Ľein' nan: “Bito co'o xtole na' bito cuejyĉhĵle

be'en chele o no'ol chele par solenle beṇə' yoblə, bito gotle beṇə', bito cuanle, bito gacle testigw fals, bito selažə'əle bitə'ətezə de'e de che beṇə'." Na' dech de'en na lein', pero na' šə choncho can' nyojən nan: "Legaque che sa'aljuežjle catg chaque che cuinle", leczə chonczocho complir yoguə' de'e ca' yelə' de'en nannə'.

10 Bazoczcho choncho cuaselol can' na lein' šə chaquecho che yeziqə'əchlə beṇə'. Čhedə' šə chaquecho čhega'aque' bitobi de'e mal goncho contr lega'aque'.

11 Catə'ən gwzolao benlilažə'əcho Cristən' gwnezecho gwžin ža yide' de'e yoblə. Na' na'a bazon bəozə əžin ža əžin orən' yide'. De'e na'anə' bitoch cheyalə' gaccho ca beṇə' čhtas, beṇə' cui bi xbab chon.

12 Na' ca naquən' bazon əžin ža par yide'enə', cheyalə' cuejyichjcho cuich goncho de'e malən' de'en bencho catə'ən ne'e nchol lo'o yichjla'ažda'ochon'. Na' na'a bagwyo'o be'eni' che Diozən' lo'o yichjla'ažda'ochon' cheyalə' goncho de'e güen.

13 Le'e do gonch can' cheyalə' goncho na'a bayo'o be'eni' che'enə' lo'o yichjla'ažda'ochon'. Bito cheyalə' lencho lni gan' chac scandl, na' bito cheyalə' gaccho beṇə' güe'e zo, na' beṇə' zargat, na' beṇə' ggo'o xtoi. Na' leczə bito cheyalə' tiləlen ljuežjcho, na' bito gue'icho beṇə'.

14 Cheyalə' gon cuincho lažə' na' Xancho Jesocristən' par nič gaquə yichjla'ažda'ochon' can' naquə yichjla'ažda'ogüe'enə', na' bito goncho can' chene'e la'ažda'omalchon' goncho.

14

Bito cheyalə' ə̄nacho che l̄juežjcho de que de'e malən' chso'one'

¹ Šə to beṇə' bachonlilaž'e'e Cristən' nechacžejlaž'e'e na' bito ne'e šejni'ine' naquən cheyalə' gone', legwlene' par gaque' txen len le'e. Pero can' naquə xbab che'enə', bito cheyalə' gaquəyožlene'.

² Zo beṇə' chone' xbab de que bito nape' dolə' šə gaogüe' bitə'atezə yelə' guao. Pero zo beṇə' bito ne'e šejni'ine' šə gaaquə gaogüe' bitə'atezə yelə' guao sin cui gape' dolə', na' de'e na'anə' šə chaogüe' porzə yixə' cuan.

³ Ben' chao bitə'atezə yelə' guao bito cheyalə' gue'ine' ben' cui chao bitə'atezə yelə' guao. Na' ben' cui chao bitə'atezə yelə' guao bito cheyalə' ə̄ne' che ben' che'ej chao bitə'atezə de que malən' chone' che'ej chaoteze'. Nezecho de que Dioz nan' banone' čhopte' ca xi'ine'.

⁴ ¿Noxa naquə chio'o na'anə' par əgwlažə' checho šə nac chon ben' bagwcua' Diozən' ca xi'ine'? Dioz nan' naque' Xan xi'ine' ca' na' le'enə' nezene' che to tocho šə choncho güen o šə choncho mal. Na' Xancho Cristən' gone' ca šejczcho goncho de'e güen čhedə' nape' yelə' guac par gone' ca'.

⁵ Nitə' beṇə' chso'one' xbab de que nchoj to ža xen na' de'e žialao lao yoguə' ža ca' yelə'. Pero na' leczə nitə' beṇə' chso'one' xbab de que tozaczə can' zjənaquə yoguə'əte ža ca'. To tocho cheyalə' socho do yichj do lažə'əcho gonlilažə'əcho de que choncho can' cheyalə' gonchonə'.

6 Beṇə' ca' chso'on xbab de que de ža de'e žialaoch cle ca ža ca' yelə' chso'one' xbabən' ca' par chso'elaogüe'e Xancho Cristən'. Na' beṇə' ca' chso'on xbab de que tozəczə can' zjənaquə yoguə'əte ža ca', leczə de'en chso'elaogüe'e Xancho Crist nan' chso'one' xbabən' ca'. Na' ben' chao bitə'ətezə yelə' guao, chaogüe'en par cho'elaogüe'e Xancho Cristən', chedə' leczə yelə' choxwlen che Dioz nan' cho'e. Na' ben' cui chao bitə'ətezə yelə' guao leczə par cho'elaogüe'e Xancho Crist na'anə' cui chaogüe'en chedə' leczə chnežjue' yelə' choxwlen che Diozən'.

7 Ni to chio'o cui zocho par niçh goncho con de'e bia'azəlažə'əcho. Na' ni to chio'o cui gatcho šə tant chene'echo gatcho.

8 Lao zocho mbancho, zocho par goncho can' chene'e Xancho Cristən'. Na' gatcho catə'ən əṇe' gatcho. Can' naquən gatcho o mbancho, naquəczcho lao na' Xancho na'anə'.

9 Par nan' got Cristən' na' beyas bebane' de'e yoblə ladžo beṇə' guat ca' par niçh ca' naque' Xan beṇə' zjəmban na' Xan beṇə' bagwsa'at.

10 Pero bito cheyalə' əṇacho de que beṇə' bišə'əcho ca' zjənape' dolə' šə por ni che de'en cui chso'one' can' choncho na'azən'. Na' leczə bito cheyalə' gue'icho beṇə' bišə'əcho ca'. Yoguə'əcho techo lao Cristən' par əçhogbi'en checho šə de xtolə'əcho o šə cui bi de.

11 Nyojczə gan' na Xancho Diozən' ne':
De'e li nada' naca' Dioz zoa' mbana',
na' de'e na'anə' yoguə' beṇə' desə'əzo xibe'
laogua'anə'
na' yogue'e əso'elaogüe'e nada'.

12 Can' naquən, yoguə'əchon' əgwdecho cuent lao Diozən' šə biquə' de'e babencho lao bguancho.

Bito goncho ca yesə'əxopə beṇə' yoblə so'one' de'e mal

13 Na' bito cheyalə' əṇacho che ni to beṇə' bišə'əcho ca' de que zjənapə' dolə' šə por ni chezə cui chso'one' can' choncho na'anə' əṇacho chega'aque' ca'. Pero chio'o cheyalə' cuejyichjcho cuich goncho bichlə de'en choncho šə chonən par nič beṇə' bišə'əcho ca' chsa'acžejlaže'e o chesə'əxopə' chso'one' de'e malən'.

14 Bitobi yelə' guao de de'e chonən manch yichjla'ažda'ochon', nada' ņezda' chedə' ngoda'a txen len Xancho Jeso'osən'. Pero šə to beṇə' chone' xbab de que de yelə' guao de'e chonən manch yichjla'ažda'ochon', par len' naquən mal šə gaogüe'en.

15 Šə por ni che bi yelə' guao de'en chaochonə' chaque beṇə' bišə'əchonə' tolə, bitoch cheyalə' gaochon, chedə' por ni che beṇə' bisə'əcho na'anə' Cristən' bnežjw cuine' gwso'ot beṇə' le'. De'e na'anə' cheyalə' gaquecho che' na' bito goncho ca cuejyichje' cuich gonlilaže'e Cristən' na' cuiayi'e.

16 Šə choncho to de'e chaquecho naquən güen par chio'o pero par beṇə' bišə'əcho ca' naquən mal, bito gonchon par nič cui yesə'əne' choncho de'e mal.

17 Šə bazocho chnabia' Diozən' chio'o, de'en che'ej chaochon' bito naquən de'e žialao xen. De'e naquə de'e žialao xen šejcho licha, socho binlo len beṇə' yoblə na' gon Spirit che Diozən' ca socho mbalaz.

18 Ben' zda licha, na' zoe' mbalaz, na' zoe' binlo len beṇə' yeziqə'əchlə, bəna'anə' cho'elao' Cristən', na' Diozən' chebeine' le', na' yeziqə'əchlə beṇə' leczə chəsə'əne' de'e güennə' chone'.

19 De'e na'anə' cheyalə' goncho ca socho binlo tocho yetocho, na' leczə ca' gaquəlen ljuežjcho par niḥ ca' gonlilažə'əchcho Diozən'.

20 Diozən' babebeje' ljuežj chio'o chonlilažə'əchone' xni'a de'e malən' par niḥ so'one' de'e güen. Na' bito cheyalə' goncho par niḥ so'one' de'e malən'. De'e na'anə' šə por ni che de'en chaocho to de'en chaocho na'azən' gonən par niḥ beṇə' bišə'əchon' gone' de'e malən', bitoch cheyalə' gaochon. Bito bi yelə' guao de de'e chonən manch yichjla'ažda'ochon'. Pero malən' choncho šə chaocho de'en chon par niḥ beṇə' bišə'əchonə' gone' de'e malən'.

21 Nca'alə xnezen' cuich gaochi belə'ənə' na' niqəch ye'ejcho binon', na' nic goncho bichlə de'en choncho šə chonən par niḥ beṇə' bišə'əchonə' gaquəžejlaže'e o əxope' gone' de'e mal o cui gwzenague' che Diozən'.

22 Šə choncho xbab de que bito naquən dolə' ca de'en choncho bitə'ətezə de'en choncho, chopzcho lencho Dioz nan' nezecho. Bito ye'echo beṇə' yoblə so'one' can' chaque chio'o güen goncho. Šə bito chacžejlažə'əcho che bitə'ətezə de'en choncho de que naquən güen, nachən' zocho mbalaz.

23 De xtolə' ben' chao to yelə' guao šə chacžejlaže'e chaquene' de que bitolja cheyalə' gaogüe'ennə', chedə' bito chonlilaže'e de que de'e güennə' chone' chaogüe'en. De xtolə'əcho šə

choncho bitə'ətezə de'en chaquecho bito cheyalə' goncho. Napcho dolə' čhedə' cabi chonlilažə'əcho de que de'e güenṅə' choncho par chio'o.

15

Bito goncho porzə de'en əṅa chio'o

¹ Chio'o bachejni'išaogüe'echo na' banezecho naquən' cheyalə' goncho. De'e na'anə' cheyalə' gapcho yelə' chxenlažə' len beṅə' ca' chse'ejni'i latə'alaszə. Bito cheyalə' goncho con porzə de'en əṅa chio'o.

² Cheyalə' goncho de'e güen de'e chsa'azlažə' sa'aljuežjcho, par nič ca' so'onlilažə'əche' Diozən'.

³ Goncho ca' čhedə' ni Cristən' bito bene' con de'e gwyazlažə'əzə le'. Na' nyojczən de que Cristən' gože' Diozən': "Beṅə' contr čchio' ca' tant chəsə'əže'e le', na' lena' boso'ožia boso'onite'e."

⁴ Na' Xtižə' Diozən' de'en boso'ozoḷ beṅə' cana' nyojən chzejni'in chio'o, par nič zotezcho chgo'o chčhejlažə'əcho catə' de de'en chsaquə'əzi'icho. Na' Xtižə' Diozən' de'en nyojən leczə chtipəchən lažə'əcho. De'e na'anə' zocho lez gaquə güen čhecho de'en gon Diozən' len chio'o.

⁵ Diozən' chone' par zotezcho chgo'o chčhejlažə'əcho bitə'ətezə de'en chac čhecho na' chtipe' lažə'əcho. Na' ṅa'a chṅaba' gone' par nič tozə ca gaquə yichjla'ažda'olen', čhedə' can' chene'e Cristo Jeso'osən'.

⁶ Chṅaba' gone' ca' par nič tozə ca ṅale güe'ela'ole Diozən', Xa Xancho Jesocristən'.

Cristən' bene' par nič beṅə' ca' cui zjənaquə beṅə' Izrael gaquə əso'elaogüe'e Diozən'

7 Ca' ža, le'e so güen tole yetole can' ben Cristan' gwcue'e to tocho ca xi'ine'. Legon ca' par ničh Diozan' si'e yelə' bala'an.

8 Echnia' le'e de que Cristo Jeso'osan' bide' par goclene' zgua'atec beṇə' Izrael ca'. Bedəyene' complir ca lyebe de'en ben Diozan' len xaxtao' chio'o beṇə' Izrael, par ničh blo'e de que Diozan' cho'e dižə' li.

9 Na' leczə bidə Cristan' par ničh beṇə' ca' cui zjənaquə beṇə' Izrael guaquə əso'elaogüe'e Diozan' de'en cheyašə' cheži'ilažə' Diozan' lega'aque'. Chac can' nyoj Xtižə' Diozan' nan:

De'e nan' ža güe'elaogua'a le',
goła' gan' ža' beṇə' ca' cui zjənaquə beṇə' Izrael par
güe'elaogua'a le'.

10 Na' yeto gan' nan:

Le'e cui nacle beṇə' Izrael, leyebei txen len beṇə'
Izrael ca', beṇə' ca' gwleј Diozan' par
zjənaque' nasyon che'.

11 Na' leczə nan:

Yoguə'le'e cui nacle beṇə' Izrael, legüe'elao' Xancho
Diozan'.

Yoguə'əle cheyalə' güe'ela'olene'.

12 Na' leczə de'en bzoj de'e profet Isaiazan' nan:

To beṇə' yidə ben' za' lao dia che de'e Isain'.

Le' nabi'e yoguə'əlol beṇə'.

Na' balə beṇə' ca' cui zjənaquə beṇə' Izrael
yesə'əbeze' gaquəlen be'enə' za'anə'
lega'aque'.

13 Diozan' chone' par ničh nezecho zotezə zoe'
chaclene' chio'o. Na' gonšgue' par ničh sole
mbalaz juisy na' so cuezle binlo juisy len xbab
de'en yo'o lo'o yichjla'ažda'olen' laogüe de'en

chonlilažə'əle Cristən'. Na' šə bazole mbalaz juisy na' bachzo chbezle binlo juisy len xbab de'en yo'o lo'o yichjla'ažda'olen', nachən' Spirit che Diozən' gonən par sotezə sole yebeile de'en gaquəlench Diozən' le'e.

14 Beṇə' bišə', nezdə' de que Diozən' babene' par nič nacle beṇə' güenchgua na' chejni'ichgüeile. Nezdə' chac choe' ljuežjle consejw tole yetole.

15 Pero de'en gwleј Diozən' nada' par gona' xšine'enə' cheyaxjda' chzoja' le'e clar che de'e ca' baṇezczele par nič yosa'alažə'əga'aclen.

16 Gwleje' nada' par nič chona' xšin Jesocristən' ladjo beṇə' ca' cui zjənaquə beṇə' Izrael. Na' cho'elenga'aca'ane' dižə' güen dižə' cobə che Diozən' par nič Diozən' yebeine' lega'aque' catə' so'onlilažə'ene'. Na' Spirit che'enə' gonən par nič əsa'aque' beṇə' la'aždao' xi'ilažə' par nič Diozən' š'olažə'e lega'aque'.

17 De'en ngoda'a txen len Cristo Jeso'osən' chebeida' cho'a dižə' che xšin Diozən' de'en chona'.

18 Bito cheyaxjda' gua'a dižə' che bi de'e baben beṇə' yoblə, sino cho'a dižə' che de'en baben Cristən' ca naquən' goclene' nada' chona' xšine'enə'. Le' bene' par nič bia'a dižə' len beṇə' ca' cui zjənaquə beṇə' Izrael, na' goclene' nada' bena' ca' par nič bale' bachoso'ozenague' che'.

19 Spirit che Diozən' goclenən nada' len yelə' guac cheinə' par nič bena' miłagr na' bichlə de'e zaquə' yesyə'əbane beṇə'. Goclenən nada' par nič babi'a dižə' güen dižə' cobə de'e chzejni'in che Cristən' doxen, gwzolaoza' Jerosalennə' bi'an, nach bežintia' gan' nzi' Ilirico.

20 Babena' byen baji'a dižə' güen dižə' cobə de'en chzejni'in che Cristən' gan' ža' beṇə' cuiṇə' se'ene len. Bito gwyə'a ga bajse'eczə beṇə' yoblə xtižə' Cristən'.

21 Can' nyojczə Xtižə' Diozən' nan:

Ca naquə beṇə' ca' cui noṇə' chixjue'i lega'aque' xtižə' Diozən', lega'aque' yesə'əṇezene'en.

Na' beṇə' ca' cuiṇə' se'enen, se'ejni'ine'en.

Pabən' bene' xbab šeje' Roman'

22 Ca' chaquən' ža, zan las catə'ən go'onda' yida' gan' nitə'əlen' bito goquə yida'.

23 Cana'aten' zelaža'a yida', pero xte na'ach babe-yož bena' de'en nžia' Diozən' bia' gona' latjə nga.

24 Na' catə' ša'a Españan' cana' che'enda' tia' əgwlaṇa'a le'e. Mbalaz soa' yeyož əgwlaṇa'a le'e, nach gaquəlenle nada' par ša'a Españan'.

25 Pero na'a yeya'a Jerosalennə' žjəyesana' de'e chəsə'əyažje beṇə' ca' nitə'ənə', beṇə' ca' bagwlej Diozən' par zjənaque' lažə' ne'enə'.

26 Beṇə' Masedonia ca' na' beṇə' Acaya ca' gwsa'azlaže'e boso'otobe' mechən' par beṇə' yašə' prob ca' ža' entr beṇə' ca' bagwlej Diozən' par zjənaque' lažə' ne'enə' beṇə' nitə' Jerosalennə'.

27 Na' de'en gwsa'azlaže'e boso'otobe' mechən' naquən to goclen de'e cheyalə' yesyə'əyontocze' len beṇə' Izrael ca'anə'. Caguə beṇə' Izrael lega'aque', pero bazjəlene' beṇə' Izrael ca' chəsə'əzi'e de'en chaclen yichjla'ažda'oga'aque'enə', na' de'e na'anə' cheyalə' sa'aclene' beṇə' Izrael ca' len de'en chəsə'əyažj chəsə'əchinene'.

²⁸ Catə' yeya'a Jerosalennə' žjəyenežjoga'aca'ane' mechən' de'en bdoḅən', cana' tia' əgwlaḅa'a le'e catə'ən ša'a Españanə'.

²⁹ Nada' nezdə' catə' la'a gan' nitə'əlen' na' güe'elencha' le'e dižə' güen dižə' cobə che Cristən', lechgualē mban' gon Diozən' len chio'o.

³⁰ Chaquecho che Xancho Jesocristən' na' Spirit che Diozən' chonən par niḅ gaque che ljuežjcho tocho yetocho. De'e na'anə' ža beḅə' bišə', chḅaba' goclen len le'e gacle nda' txen goncho orasyon lao Diozən' xte ga zelao saque'echo par niḅ gaquəlene' nda'.

³¹ Nabechone' gone' ca cui gaca' lao na' beḅə' Jodea ca', beḅə' ca' cui chso'onlilažə' Cristən', na' lecza nabcho par niḅ beḅə' Jerosalen ca' beḅə' ca' bagwlej Diozən' par zjənaque' lažə' ne'enə' so'olažə'e de'en güe'ega'aca'ane'enə'.

³² Can' goncho orasyonḅə', na' šə Diozən' güe'e latjə, nada' yebeida' yida' delana'a le'e, na' gona' dezcanz gan' nitə'əlenə'.

³³ Diozən' ben' chon par chzo chbezcho binlo len xbab de'en yo'o lo'o yichjla'ažda'ochon', gaquəlene' yoguə'əle. Ca'ašgaczən' gaquə.

16

Pabən' chguape' diox beḅə' ca' nombi'e

¹ Chḅeyoida' le'e legon txen len beḅə' zanchō Febe catə'ən le'e gan' zolenə'. Lene' nchoje' naque' comisyon che beḅə' ca' chəsə'ədopə chəsə'əžag chso'elaogüe'e Jesocristən' lao yež Sencrean'.

² Legon txen len le', chedə' can' cheyalə' gon chio'o naccho lažə' na' Diozən'. Can'

chonlilažə'əcho Xancho Jesocristən' leczə can' chonlilažə' Feben' le'. Legaclene' šə bi de'e chyažj chchinene', chedə' beṇə' zan bagoclene', na' leczə ca' bagoclene' nada'.

³ Legguap Prisilan' na' be'en che' Aquilan' diox. Lega'aque' bagwso'one' žin che Cristo Jeso'osən' txen len nada'.

⁴ Boso'osanlažə' cuinga'aque' sa'ate' par gwsa'aclene' nada' nič cui gwso'ot beṇə' nada'. Chsela'a yelə' choxcwlen chega'aque' can' gwso'one', na' leczə ca' yoguə' beṇə' cui zjənaquə beṇə' Izrael beṇə' ca' chəsə'ədopə chəsə'əžag chso'elaogü'e Diozən' ga yoblə leczə choso'osele'e yelə' choxcwlen chega'aque'.

⁵ Legguap diox beṇə' ca' chəsə'ədopə chəsə'əžag liž Prisilan' na' Aquilan' chso'elaogü'e Diozən'. Leczə legguap diox Epeneton' be'enə' chacda' chei. Le' naque' beṇə' nech benlilaže'e Cristən' entr beṇə' Acaya ca'.

⁶ Legguap diox Marian', la' babenchgü'e žin par le'e.

⁷ Legguap diox beṇə' gwlaž chia' Andronico na' Jonias. Txen gotə'əto' ližya len lega'aque'. Na' lega'aque' zjənaque' beṇə' blao entr neto' apostol, na' lega'aque' byob gwso'onlilaže'e Cristən' ca nada'.

⁸ Legguap diox Ampliasən'. Chonlilaže'e Xancho Cristən', na' chacda' che'.

⁹ Legguap diox Orbano ben' chon txen len chio'o choncho xšin Cristo Jeso'osən', na' leczə ca' Estaquis be'enə' chacda' chei.

¹⁰ Legguap diox Apeles ben' bablo'echgua de que chonlilaže'e Cristən'. Leczə legguap diox beṇə' ca' nita' liž Aristobolo.

11 Legguap diox beṇə' gwlaž chia' Erodion, na' beṇə' nitə' liž Narsison' beṇə' chso'onlilažə' Xancho Cristən'.

12 Legguap diox Trifena na' Trifosa beṇə' güen žin che Xanchon'. Na' leczə ca' legguap diox Persida be'enə' chacda' chei. Babenchgüe' xšin Xanchon'.

13 Legguap diox Rofo. Le' naque' beṇə' blao entr chio'o chonlilažə'əcho Xanchon'. Na' leczə legguap diox xne'enə' be'enə' leczə naquə ca xna'a.

14 Legguap diox Asincrito, Flegonte, Ermas, Patrobas, Ermes na' len beṇə' bišə'əcho ca' nitə' len lega'aque'.

15 Legguap diox Filologo na' Jolia na' Nereo na' beṇə' zane', na' Olimpás, na' yoguə' beṇə' yeziquə'əchlə nitə' len lega'aque' beṇə' ca' bagwlej Diozən' par zjənaque' lažə' ne'enə'.

16 Na' catə' chežagle leyolguiž ljuežjle dižə' šao' par nič gachia' de que chaque che ljuežjle. Na' beṇə' ca' nitə' nga na' len beṇə' ca' nitə' ga yoblə chəsə'ədopə chəsə'əžag chso'elaogüe'e Cristən', yoguə'əga'aque' choso'oguape' le'e diox.

17 Chneyoida' le'e beṇə' bišə' par gapple cuidad len beṇə' ca' zjənaquə beṇə' gotil na' chso'one' par nič beṇə' yeziquə'əchlə chso'one' de'e mal. Beṇə' ca' chso'on ca' chso'one' contr de'en babsedcho che Diozən'. Na' bito gonle txen len lega'aque'.

18 Beṇə' ca' chso'on ca' bito choso'ozenague' che Xancho Jesocristən', con chso'one' de'e bia'azəlažə'əga'aque'. Xochechgua chso'e dižə' choso'opeine' beṇə' ca' chse'ejle'edazə, na' choso'oxoayague' lega'aque'.

19 Yoguə' beṇə' zjənezene' de que le'e chzenagle che Diozən', na' de'e na'anə' chebeida'. Na'

che'enda' sole cue' yichjle par gonle de'e güen caguə par gonle de'e mal.

²⁰ Na' Diozən' ben' chon par chzo chbezcho binlo leczə le' gone' par nič lgüegwzə əgwlej əgwšošjle xtižə' gwxiye'enə'. Na' Xancho Jesocristən' sotezə soe' gaquəlenšgacze' le'e.

²¹ Temtio' ben' chonlen nada' žin chguape' le'e diox. Na' leczə ca' bišə' ljuežja' quinga choso'oguape' le'e diox, Losion', Jasonə' na' Sosipaterən'.

²² Nada' Tersio chzoja' cart nga con can' na Pabən', leczə əchguapa' le'e diox, ca naquə le'e chonlilažə'əle Xanchon' can' chonlilaža'ane' nada'.

²³ Chguap Gayon' le'e diox. Nada' Pab zoa' liže'enə'. Na' leczə liže' na' chəsə'əžag beṇə' ca' chso'elao' Cristən'. Erasto ben' naquə tesorer che syodan' chguape' le'e diox, na' beṇə' bišə'əcho Cuarto.

²⁴ Chnaba' gaquəlen Xancho Jesocristən' yoguə'əlolle. Na' ca'ašgaczen' gaquə.

Cho'elaogüe'e Diozən'

²⁵⁻²⁷ Ledoye'ela'och Diozən' zejlicane, Dioz ben' naquə le'ezelaogüe beṇə' sin'. Len' nape' yelə' guac par chaclene' chio'o nič sotezə socho gonlilažə'əchone' na' chaclencze' can' na de'en əchyixjui'a che Jesocristən'. De'en əchyixjui'a na'anə' naquən to dižə' güen dižə' cobə de'en cui no gwṇeze dezd ža gwlasda'ote, pero ṇa'a Diozən' bablo'ine'en chio'o. Diozən' babene' ca baṇezechon, babzejni'ine' chio'o bi zejen de'en boso'ozoj de'e profet ca'. Dioz ben' zo zejlicane bene' mendad par nič yoguə' chio'o beṇəch əṇezecho dižə' güen dižə' cobə che Jesocristən' par

əgwzenagcho che' na' gonlilažə'əcho Jesocristən'.
Na' Jesocrist na'anə' gaquəlene' chio'o par
güe'ela'ocho Diozən' zejlicaņe. Na' ca'ašgaczən'
gaquə. *Pab*

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2